

JINGÙLÙLÀ DITÙKÙ

DYÈBÈ NÈ MUKENJI WÀDÌ



Beetwabu mu dinda emu, nwênù balunda baanyi. Twǎnjì kushaalaayi biimanyine kuulu bwa katanci kakese.

Nzambi munanga, twêtù aba, mu mùsùkùsukù ewu ne kàyùmbayùmba kaa mu nsòmbelu wa panwapa aka, bu mutudi banji kushaala mu cinyaanya munda mwa katanci kakese anyi dîbà dijima didi dilonda edi, cyònsò cidi mwa kwikalaku aci, cyùdì Wèwè mutulongolwele aci, bwa twêtù kuKupingajila luumu ne butumbi, kuyiisha Dîyì Dyebe, bwa kutamba kuKumanya, ke bwalu kaayi tudi bakungwile mu dinda emu. Tudi tuKusakidila, Nzambi, bwalu nkweku kudi bantu bakaadi badilongolole ne badyākàje bwa kulwa kuteeleja. Nansha mudi maalu a cikondo eci amweka, mutudi mene tusanganyibwa ne mwoyi, nyewu bacidi anu biitabuuje. Nenuk tudi tuKusakidila bwa bwalu bwabo.

² Nzambi, tudi ne kusakidila Kùdì bwa bukole Bwebe bunene bwa dyondopa, milayi ya Dîyì Dyebe. Mushindu mwine udi myoyi yetu mikwate kapyà patudi tuumvwa majaadiki aa! Ntatu ya mishindu yònsò idi myela pambidi paa bânà baa bantu! Wèwè, ne ngàsà ne bukole Byebe, ne mulayi Webe kabidi, byafiki ku dibondopa. Nenuk nyewu badi mwab'ewu, biikale bafila majaadiki, baKupa luumu. Tudi tuKusakidila bwa ciine aci.

Nenuk enzaku bwa mpindyewu, leelu ewu, twêtù tùmvwè Mukenji ùdì Wèwè mutulongolwele bwa dîbà edi. Patudi tubala munda mwa Dîyì Dyebe apa, watupaku dyumvwija dya bitudi tubala. Diswa Dyebe dyenzeke mu maalu ònsò, bwalu tudi tubilomba mu Dînà dya Yesu. Amen.

Nudi mwa kusòmbaayi.

³ Edi ndyèsè bwa kwikala mwab'ewu mu dinda emu. Mémè ndi ne disanka dyàbùngì bwenu bònsò. Nenuk Mwaneetu Woods, Mwaneetu Roy Roberson, bânà beetu bakwabo bààbùngì baa balume, mbakwate mudimu ne lulamatu lwònsò matuku abidi mashaale aa, bwa kwasa kwa byamu bidi bifila citaleela mu nzubu ewu bwa kiine kiipacila aka, bwalu mu dyalumingu dishaale bavwa bamone munuvwa batate. Nenuk bǎngàcì ndambu wa mfranga mu cibucilu cya ekeleeziya, ne bǎdìtu mu mudimu bwa byamu ebi kutambulabi bwa kunùsòmbeshabò bacyankame, ne mfranga miine inutu nweleela ya milambu ayi, bwa panwikala basòmbè, nuteeleje Mukenji. Leelu kudi citaleela cyàbùngì kutamba civwàku diine dîbà adi. Pa nanku

tudi ne kusakidila kudi Nzambi, ne kunudi nwênù aba, bwa mpunga ewu.

⁴ Ne disanka...Mwaneetu Roy Borders, uvwa ujinga kushaadila lwa paanyima paapa mu dinda emu. Kadi mêmè ngamwambidi bwa angate nkwasu wende bwa alwe kusòmbela lwa kuneeku pamwe ne bambi aba, kadi yèyè kavwa anu muswe kwenza nanku to. Anu munutu bamanye nwènu bònsò amu, Mwaneetu Borders ngutu muleeji wa mpala mu budimi bwa bwambi pa kaaba keetu. Ndi ne disanka dyàbûngì dya kwikala ne Mwaneetu Borders, ne bakwabo bambi ne balunda aba.

⁵ Munkaci mwa lumingu ntu—ntu mfika ku didyambidila, ngamba ne: “Pàngààpwekà kwaka, mu dyalumingu, nênsakidilè mwambi ne mwambi yònsò, muntu ne muntu.” Pashiishe paudi ufika mwab’ewu, udi wangacika mu Mukenji umba upwa biine byònsò abi mwoyi, pabwîpi ne byònsò, ciine civwaku aci.

⁶ Mpindyewu bikengela ngalukile ku Arizona. Bikengela ngalukile mu dimwe didi kumpala edi, dya lukwabo lumingu lwalwa, ngalukila mu Tucson, bwa kwaluja bâna bwa kubwelabo mu tulaasa. Ne pashiishe nêngalukilè paanyima paa cyôci aci. Nenku bikengela mukajaanyi ikale kwine aku kumpala kwa dîbà, bwa kubangaye...bwa kufundisha bâna, mbingu ibidi kumpala kwa tulaasa kubangatu. Nenku mêmè, pashiishe, nêngalukilè bwa ndambu wa matuku kuneeku.

⁷ Nenku mpindyewu ke cyanyi cikondo cya diikisha eci. Bu munudi bamanye, ndi nyiisha kubangila ku ngondo wa dikumi ne mwibîdi; ngondo wa kumpala, ngondo mwibîdi, ngondo mwisâtù, ngondo mwinâyi, ngondo mwitânù, ngondo mwisambombo, ne ngondo wa mwandamutekete. Mpindyewu, bu Nzambi mwa kwanyisha, kadi kwôkò kakuyi dibiikila dya pabwadi to, ewu mmuvù ûntù mêmè—mêmè—mêmè ngangata dyanyi diikisha, cyanyi cikondo cya diikisha. Ntu nya katwa buluwa. Nenku ntu... .

⁸ Mpindyewu bu Mukalenge ne cya kumbiikila bwa cintu cikwabo kampanda, bintu bu nanku kabitu bya tubala to. Nzambi utu misangu yònsò anu pa kaaba kaa kumpala. Nenku ntu muswe Yèyè ikale pa kaaba kaa kumpala, ne nwènu’s nutu baswe bwa Yèyè ikale pa kaaba kaa kumpala. Kadi pa dîbà adi kwôkò kakuyi dibiikila kampanda to, ne ciine aci ciikale diswa Dyende, ke cidi cikengela mêmè kwenza mpindyewu munda mwa ngondo ibidi idi ilonda eyi, mbwa mêmè kuya katwa buluwa mpindyewu, bwa ngikishe. Mêmè... .

⁹ Kanwena nufika ku dyumvwa to, baa pa buloba kabatu bamanyeku to, maalu adi akengela mêmè kupicila. Nwamonu anyi? Nenku cidi anu disaamisha dya mutu dyetu dya menemene edi. Kabyena bikemesha bwa pavwa Mukalenge mwambile bayiidi Bende, pavwaYe wendakana naabo ne: “Lwâyi ku luseke mu mwaba wa cipeela, nwikishe kakese.” Nwamonu

anyi? Ndi mêmè mfika ku dyumvwa cintu aci bikole, dituku dyònsò, ne nangananga padi matuku aanyi enda avula pa buloba, nwamonu's. Pândi ngenda nkola, udi ufika ku dyumvwa cyôci aci. Nudi nuumvwa mpaasata wetu mudiye utwa "amen" ku cyôci aci, yèyè pende. Yèyè, twètù, tudi mwa kufika ku dyumvwa ne katucyena kabidi bansongalume to patukaadi bamane kupita bidimu makumi ataanu. Mpindyewu bikengela tupeteku ndambu wa dîbà.

¹⁰ Tudi ne kusakidila kwàbûngì bwa majaadiki atwáfûmu ku dyumvwa aa. Mukajaanyi uvwa kwa Mandamu Woods, makeelela awu, paalu bantu bakwabo bafumina ku Alabama, lwa kwine kuntwaku, biikale balondelangana maalu manene adi Nzambi mwenze mu disangisha adi, mudi bânà batekete bondopiibwe, ne maalu mashiileshiilangane. Ne maalu àbûngì, ekelekele, bifwanyine kwangata mukûngûlù mule bwa kuàlonda kumana.

¹¹ Pashiishe bikengela mvuluke paanyi ne . . . Ndi ngela meeji ne bamwe baabo mbangabile ne Mwaneetu wa bakaji Larson udi mwab'ewu ne mwânà mukese wa mu diboko kukaadi maadyalumingu abidi. Ncyêna anu mufwanyine kumanya to, kadi ndi ngela meeji ne bavwa bamba ne kavwa nkiiikulu kende, misangu mikwabo, bwa dikalambula kudi Nzambi, mufume naaku ku Chicago. Inàbânzà awu mmutuleeje musangeelu wàbûngì, ne twètù peetu tudi tumwanyisha be. Nenku mmufumine ku Chicago ne mwânà mukese wa mu diboko ewu, bwa kumulambula kudi Nzambi. Mbyenze ne, mmupete ndambu wa dîbà cyanaana bwa kupatuka nende, ngela meeji, bwa kumulambula kudi Nzambi, kadi dilambudiibwa dya mwânà ewu kudi Mukalenge ndimulengeleele be. Pa nanku bu Mwaneetu wa bakaji Larson mwa kwanyisha, pâncidi ngakula apa, bu yèyè mwa kutwala mwine mwânà wa mu diboko awu bwa mudimu ewu wa dilambula kudi Nzambi.

¹² Nenku pashiishe, misangu mikwabo, pacidiye udilongolola apa, ndi muswe kwamba ne edi ke Dyiisha dya ditambe kukola boo dînkadiku paanyi muteete bwa kulongolola, too ne makeelela diloolo awu. Munda mwa lumingu lujima elu, mvwa mwa kubwela mu cibambalu, bwa kuteetaku bwa kushaala ku luseke paanyima paa mabiikila âmvwà mupete ne bintu bikwabo, bwa kuteeta bwa kupeta cintu kampanda mu meeji bwa dîbà edi. Kadi pâmvwà nya, ncivwa—ncivwaku nansha . . . Mvwa mu mutu mutupu. Nenku, ke makeelela awu, mêmè kuya kabwela mu nzubu wa mwinshi mwa buloba. Mvwa ngela meeji ne kuvwa luuya lupite bûngì, ke mêmè kupweka e kubwela mu nzubu wa mwinshi mwa buloba, e kusômbelamù. Nenku pâmvwà nteeta kwangata Bible wanyi bwa kubala, mvwa anu ndaala tulu. Pashiishe mvwa njuuka ngangata mâyi nwa, ne nteeta bwa kudinyukulula, kupatuka pambelu ne kwendakana eku ne eku, nsômba pa cibandilu.

¹³ Muntu kulwaye mwab'awu kunjikidila mêmè mwikale mukopole muteelu, musòmbe pa cibandilu apu, kuvwa luuya lubi be. Kunkupaye cyanza. Neivwa mumanye ne uvwaye ukupa cyanza. . . Muntu kampanda, uvwa mufwanyine kwikala muntu kampanda wa mwetu muneemu mu cimenga emu, anyi uvwa mwa kwikala muntu kampanda wa mu ekeleeziya; munkupe cyanza. Nenku mvwa mu dyelangana dya meeji dikole mu mushindu wa ne, kwenzekabi anu ne mêmè ntape dîsù ku mashinyi miine awu, bu muvwawu apicila mwaba awu. Mêmè kukupa cyanza.

¹⁴ Diloolo dya makeelela mvwa mubwele mu mashinyi kuya mubande too ne lwa mu Charlestown, nteeta bwa kupeta cintu kampanda. Mukalenge, muvwabi bimweka, uvwa ujinga kungambila cintu kampanda, kadi mêmè. . . Sataana uvwa uteeta bwa kuncyamakana kumpala, bwa kumpangisha bwa mêmè kucyenza. Ke mêmè kudyambidila ne: “Ee, yêyè mwenze nanku, mêmè's nêntungunukè anu ne kushaala mwindile, ntungunuka anu ne dindila, ntuuta anu bintu ku ciibi too ne paakangulaYe.” Pa nanku awu kukaadi mutanci, anyi paanyima kakese paa dîbà mwandamutekete wa mu dinda emu, mvwa mujuuke pa bulaalu pa bwebwebwe.

¹⁵ Makeelela awu, mwikale nsaama ndambu, nteeta. . . Mvwa mudyè matala awwa kaàyi mapetangane bîmpè menemene ne cifu cyanyi to, bu muvwawu ne mudilu mukole, nenku mvwa—mvwa nteeta bwa kusuukakanaku ku cyôci aci. Nenku—nenku pashiishe mu dinda emu, lwa pa dîbà mwandamukulu, ke kungenzekelabi ne ngangate Mufundu uvwa mungenze cikuma. Nenku mêmè kutapa cyakabidi dîsù ku mwine Mufundu awu, ke Wôwò kungenza kabidi cikuma. Nenku mêmè kuya, ngenda ngendesha Cyôci aci mu Mufundu, nenku nyewu mfuma ku dijikija anu mu tusunsa tukese emu. Pa nanku bidi mwa kwikala ne Mukalenge ikale ne Mukenji wa kututumina, mu dinda emu, udi Sataana muteete bwa kutupangisha bwa kuwupeta.

Bu wêwè mwa kuswa udi mwa kulwa ne mwânà mukese awu mwaba ewu, Mwaneetu wa bakaji Larson? [Mwaneetu Branham udi ulambula mwânà wa mu diboko kudi Nzambi. Katupa kaa mukaba wa mêyì munda mutupu—Muf.] Nzambi ikale naabo ne abakwacishe.

¹⁶ Mpindyewu ngänùlamì, dyalumingu dishaale, matuku abidi, ne ndi ngela meeji. . . anyi, masangisha abidi, dinda ne diloolo, ne cyôci aci cidì cinutacisha be. Ndi muumvwe bamba ne bidi. . . bamwe baa kunudi badi ne cya kwenza ngendu mile, ne kupumbisha ku mudimu dituku dijima, ne bikwabo. Pa nanku nansha byôbì ne bidi bikengela bwa twêtù kuumuka mu dyalumingu, mu dimwe, dya lumingu lukwabo, nêmmanyishè anu bwa disangisha dya mu dyalumingu didi dilonda, bu Mukalenge mwa kwanyisha, nwamonu's, amba anu disangisha

dyòdì difwanyine kushaala kabidi bwa diloolo edi. Nwamonu's, aci, aci nцитangile . . . Nudi bààbùngì be!

Mbanganyi badi baswe bwa kwikaladi diloolo edi, twänjìbi kumona, bwa kwenza masangisha diloolo edi? Mpindyewu, badi baswe bwa ciikale mu dyalumingu dilwalwa edi, elaayi byanza muulu bwa edi didi dilonda? Aakaa! Ekelekele, aka's nkamwe mwa kamwe. Uh! [Muntu mukwabo udi wamba ne: "Baapangidyanganyi, mwaneetu!"—Muf.] Wamba ne? ["Enza misangu yònsò ibidi."] Eyo! [Mwaneetu Ben Bryant udi wamba ne: "Enza diloolo edi, kwenza ne mu lumingu ludi lulonda, kabidi, Mwaneetu."] Leka bwalu, leka bwalu, Ben! [Mwaneetu Branham udi utudika mu tuseku.]

¹⁷ Ndi ne Diyiisha edi, ndile, mu dinda emu, kadi ncyèna mumanye mushindu kaayi mene . . . Ne ndi mumanye ne mèmè ngutu wambulwisha bwa kwenza mikenji ya mu ekeleeziya, kadi mu biine abi, bu nwènù mwa kutangila bîmpè, ndi mwambe ne: "Amba anu mèmè nkwata mèyi pa mukaba." Nwamonu anyi? Pa nanku, eci tudi tukwata pa mukaba. Eyo. Pa nanku mîngà misangu netuteete kwalukila misangu yònsò ibidi, diloolo edi ne dyalumingu dilwalwa edi, pashiishe, nebyenzeke nanku bu Mukalenge mwa kwanyisha, nwamonu's. Mpindyewu, nwènù kanuyi bapete diyiisha lumingu elu, nenku nwâlwayi dyalumingu didi dilwa edi.

¹⁸ Ndi ngumvwa bingenza bibi ku mwoyi bwa kunupingaja misangu ibidi nanku awu, kadi ndi ndyumvwa ne nkutushaadile anu dîbà dikese. Nenku nwavulukaayi anu ne, dîbà dyòdì dicîkàle anu dyenda diya, katwakwikala ne dyèsè edi musangu mule to. Nwamonu anyi? Nwavulukaayi ne, cintu kampanda necyenzeke. Anyi mikenji ya ditunga neitwîmànyîkè, anyi Sataana neabwele munkaci mwenu ne neanutangalaje. Bitu misangu yònsò anu mushindu awu. Nwamonu anyi? Cintu kampanda necyenzeke, pa nanku twanyishaayi kasunsa ne kasunsa katudi basangile pamwe.

¹⁹ Pa nanku mpindyewu bwa aba badi ne cya kwalukila ku mbanza yabo, diloolo edi, nebiikale anu bu diloolo dya dyalumingu dishaale, mvwa muyiishe anu—anu kaaDiyiisha kakese kîpî. Ne pa nanku, nwènù, nwènù baswe kudipeta pa mukaba, mona's, netunutumine bulelela mukaba awu piikalabi bikengela ne nwalukile ku mènù. Katwena . . . Nènyiishè diloolo edi, piikala Mukalenge mwanyishe.

²⁰ Mvwa ne kabeji kafunda makeelela awu, anyi—anyi dyabwabwa, kaaDiyiisha kakese kâmvwà mufunde pa cintu kampanda civwa cimvwile ku mwoyi, ne ciine aci ncyà ntanta mule. Twamb'eku twamb'eku, kudi Mayiisha abidi. Mbyenze bu didi pankaci nanku awu, dimwe dya ku ôwò awu didi ne: "Ciinà cidi cizololoka mâyi," anyi ne: "Kukuna cipeepele kadi kunowa mvunda," Diyiisha cyanaana dya mu Evanjeeliyo. Mu dinda

emu ndilongesha. Ne pa nanku, diloolo edi, anyi nêngàkulè pa: “Kukuna bipeepele kadi kunowa mvunda,” anyi: “Ciinà cidi cizololoka mâyì.”

²¹ Nenku, mu dinda emu, ndi njinga kubala mu Mifundu Minsantu mpindyewu.

Nenku, nudi bacyankame anyi? Ambaayi ne: “Amen.” [Disangisha didi dyamba ne: “Amen.”—Muf.] Bîmpè.

Mpindyewu ndi muswe ne, mu Bibles yenu ayi, nubuulule pamwe naanyi mu Mukanda wa Hoshea, nwênù badi bajinga kubala. Nenku tubalaayi ndambu wa mvense mu nshapita 6 wa Mukanda wa Hoshea, muprofeta.

Nenku tujukilaayi kuulu.

²² Nzambi munanga, twêtù katwena baakanyine bwa kwangata Mukanda ewu mu byetu byanza ebi to, bwalu nyewu tubala mu Mifundu emu ne kakuvwa muntu nansha umwe anyi mu Dyulu anyi pa buloba, anyi mwinshi mwa buloba uvwa mwakanyine anyi mene mukumbane bwa kwangata Mukanda, anyi mene bwa kutangilaPu. Kaa, nenku kwakalwa Umwepele uvwa mwenzè bu mwànà wa mukooko uvwabo bakose muminu; Yèyè ngwâkangata Mukanda awu, bwalu Yèyè uvwa mwakanyine, nenku Yèyè wakakangula Bitampi byawu. Nenku Yèyè ngutudi beeyemene mu dinda emu bwa abuulule dyumvwija edi didi difunda mu Mukanda ewu, bwalu wôwò m’Mukanda wa Bupikudi. Cyônso cidi cipikudiibwe ncifundamu. Enzaku bwa tupeteku kaaba keetu, mu dinda emu, mu cikondo citudi ne mwoyi eci. Bwalu tudi tulomba nunku mu Dînà dya Yesu. Amen.

Lwâyi mpindyewu, twalukile kudi MUKALENGÈ: bwalu yèyè ke udi mupandè, ne yèyè ke watwondopa; yèyè ke udi mutuute, ne yèyè ke watuswika mputa.

Paanyima paa matuku abidi yèyè neàtwâkidilè; mu dituku diisâtù yèyè neatujuule, ne netwikale ne mwoyi kumpala kwende.

Pa dîbà adi netumanye, patwananukila bwa kumanya MUKALENGÈ: diya dyende ndilongolola anu bu mudi dînda; ne yèyè nealwe kutudi anu bu mudi mvula, bu mvulambedi ne mvula mishiishe pa buloba.

Wèwè Efrayima, cîngâàkwenzelâ ncinyi? Wèwè Yuda, cîngâàkwenzelâ ncinyi? Bwalu bwakane bwebe budi mudi ditutu dya mu dînda, ne budi bujimîna anu mudi lumuma lwa pacyacya.

Ke bwa cinyi Mêmè ngâbâpempî ne baprofeta baanyi; ngâbâshipî ne mêyî a mukana mwanyi, ne dilumbulwîsha dyebe didi bu bukênkè budi bupatuka.

Bwalu ngâkajînga luse, kî mmulambu to; ne dimanya dya Nzambi kupîta milambu myosha.

Kadi bôbò bu bantu baakashipa cipungidi: bakaadi bandiile citungu.

Gaalada ncimenga cya benji baa bubu, ne yêyè mwine mmunyanguke ne mashi.

Nenku anu mudi tusumbu twa banyengi baalamina muntu, ke mudi cisumbu cya baakwidi cishipangana mu njila biikale buumvwangane; ne . . . biikale benza maalu a busenji.

Ndi mumone cintu cidu cikwacisha bwôwà mu nzubu wa Izaleela: mudi bundumba bwa Efrayima, Izaleela wakooyiki.

Kabidi, Wêwè Yuda, yêyè nyawu wâtumu dinowa bwebe wêwè, pângààkapingàjà bavwabo bakwate baa cisamba cyanyi.

²³ Mukalenge Yesu, patula mu Cyôci eci, ku Nyuma Mwîmpè Webe, dyumvwija didi dimana kulongolola, bu mutwikala mwa kushaala baKwindile Wêwè kumpala eku. Mu Dînà dya Yesu. Amen.

²⁴ Mpindyewu, cyena bwalu cyanyi mu dinda emu cidu ne: *Jingûlûlâ Ditûkû Dyèbè Nè Mukenji Wâdî.*

Tudi tumona ku dileesona dya dyalumingu dishaale, bu mutuvwa balongeshe ne: *Difesto Dyâ Mpungi.* Nenku ndi muswe kukoka ntema yenu, mpindyewu, cikondo—cikondo cya Izaleela mu ntankù wa Nzambi.

²⁵ Tudi badifile lelu ewu ku dileesona dya kalaasa kaa dyalumingu, bu mûndi njinga bwa nufike ku dyumvwa ne nujingulule cikondo cinudi ne mwoyi. Tukaadi pabwîpî ne kutwa ku cibungubungu, bu munudi bamone emu. Nenku pashiishe, ku cyôci eci, bivwa bikengela nwênù kumanya dîbâ ne cikondo menemene, ne cimanyinu ne Mukenji unudi ne cya kwakidila.

²⁶ Mpindyewu, patwabangi mu dyalumingu dishaale . . . Tuvwa twakula twamba ne netuyiishe pa bidi bitangila Mpungi, Mpungi Mwandamutekete ya ndekeelu ya Bible. Nenku mêmè, mu mêmè mwine, mvwa ncinka ne yôyi iwva mwa kubwayika anu menemene mvwa Bitampi byenze amu. Kadi ngaavu kumona ne ku dikangula ne dikangula dyônso dya byôbî abi nkwenzeke anu cintu cya cinenaanaale.

Nenku patwalu kuyiisha *Bikondo Mwandamutekete Bya Ekeleeziya*, ne byôbî kwikala bipwangane bikole mu mushindu wa ne Nyuma Mwîmpè Yêyè Mwine kudipwekelaye munkaci mwetu bwa kucishindika, ne kucifundabo ne mu bibejibeji, ne kucitangalajabo mu ditunga dijima, ne kucileejaye mu ngondo mu maulu, ne kutujaadikilaci, mbingu ne ngondo kumpala kwa kwenzekaci, ciine aci anu mu mushindu menemene uvwaci mwa kwenzeka, anu menemene. Muneemu mu tabernacle Yêyè

kucimanyisha. Apa pa . . . mu bikondo, Yèyè kucimanyisha. Mu ngondo ne mu dîbà, Yèyè kucimanyisha. Ne mu myaba idi matunga asanganyiibwa dîbà ditudi edi, Yèyè kucimanyisha; pavwa mfumu wa ntendeleelu wa Loomo muumuke ne mwalukile ku Palestine, badi bacinka ne ke paapà wa kumpala udi mwalukilemu kacya (mudibo bamba bôbò) Peetelo wikala paapà. Mpindyewu, civwa cintu cya nkemenu menemene!

²⁷ Pashiishe, tudi tumona, kumpala kwa Bitampi Mwandamutekete bivwa bisokoka maalu masokoka ônsò.

Nciyi nansha mumanye cîmvwà nzola ku cibasa to, bwa Bikondo bya Ekeleeziya. Ncivwa mumanyeku to. Nzambi ngudi mumanye. Anu ku cikeena-kumona cyanaana, mêmè kubizola. Nciyi mumanye ne Nzambi, cidimu ne ngondo isambombo paanyima, uvwa mwa kucishindika mu maulu, ku ngondo, ne kucipicisha mu bibejibeji bya ditunga. Ncivwaku mumanye aci to. Ncivwa mumanye ne kuvwa mwa kulwa difiikisha dya dikemesha mu ngondo to, bwa kuleeja mpala wa Cikondo eci cya Laodikiya.

²⁸ Mpindyewu, mu bibejibeji, nudi nupetamu anu bikondo bisambombo cyanaana. Mbwalu ekeleeziya wa Laodikiya mbamufiikishe fitutuu yônsò nkòong. Nenku bu nwênù mwa kutangila bîmpè ngangacilu wa bwalu ebu mu nyuma, mudi Nzambi muciteeke mu dyulu. Pângăcîtèèki mêmè pa buloba apa, ndi mushiye kaaba kakese menemene, munudi numona emu, anu kaabukênkè kakese menemene. Aci civwa menemene kumpala kwa Basungula mene kubiikidiwbabo bwa kuumuka pa buloba, kabingila kândi mukateekele kiine kaaba aku bwa cikondo cya mwandamutekete. Kadi paalu Nzambi kukateeka mu maulu, kavwa anu kafiikisha fitutuu, ciikale cyumvwija pâmwâpa ne wa ndekeelu ukaadi mumana kubiikila bwa kupatuka mu Cikondo aci cya Laodikiya. Katwena bamanye. Nkufwanyine kwikala diyiisha dijima pa bwalu ebu.

²⁹ Mpindyewu tangilaayi bîmpè cyakabidi, kumpala kwa Bitampi Mwandamutekete, bîmvwà mêmè ewu nciyiku mwele meeji ne bivwa mushindu awu to.

Muneemu mu tabernacle Yèyè wakacyamba, ke kuntumaYe ku Tucson, Arizona, mwikale unwambila nwênù aba byônsò bivwa mwa kwenzeka. Kabidi kudi bantu basômbe mwaba ewu, lelu ewu, bavwa kwine kuntwaku bwa kucimona cyenzeka menemene anu mwakambiibwaci ne necyenzeke apa ne: “Banjelo Mwandamutekete bavwa mwa kulwa.” Pashiishe bibejibeji kucipatula, ne bikandakanda, eku ne eku kwa ditunga ne: “Cijengu cya Bukênkè cidi kaciyi cyumvwika to mu mmwenekelu wa musaka,” anu menemene mushindu ûmvwà mucizole ne munuleejeci kaaba aka. Cyôci kajuukila mwaba uvwa Banjelo abu biimanyine, ne kubandaci muulu ntanta wa miles makumi asatu [kilomeeta 48], ciikale miles makumi abidi

ne mwandamutekete [kilomeeta 43] mu bucyama; anyi miles makumi abidi ne mwandamutekete mu butumbuke, ne miles makumi asatu mu bucyama, nyewu nkaadi mupwe too ne mwoyi mwine muvwabi. Ke kumwenekaci mu ditunga dijima, anu lwa kuulu kwa Tucson, Arizona, anu mwaba menemene uvwaci cyenzekele, pa dîbà dimwedimwe adi.

³⁰ Nwamonu's, Bible mwine—mwine, Nzambi kêna anu... Eci kacyna anu muntu kampanda mwikale uteeta bwa kunwitabuujija cintu kampanda ku bukole to, kadi bwa kunubuulwila ngangacilu mwine wa mu nyuma wa dîbà ditudi.

³¹ Nenukushishe, Diyishi dyalondu, dyākàngulu Bitampi Mwandamutekete, didi dikutulule maalu masokoka ônsò a Bible, Malongesha, ne bikwabo. Cyôci aci, buloba bujima budi bucilwisha leelu wa Ndaaya ewu, buCilwisha ne cikisu cyônsò biikale bamba ne nCya mafi, *bikampanda*, *bikansanga*.

³² Apa dituku dikwabo mu Arizona, balamakaja tutupa twa mikaba ya mēyì, bwa kuteeta kungambishisha bintu bîndi mēmè nciyi mwambe to. Vulukaayi anu cikeena-kumona cya disungula dyenzela Arizona! Bible mmwambe ne: “Bivwa mwa kwikala bitambe bwîmpè bu bakuswike dibwe mu nshingu.” Ne cikwabo cintu, ne: “Muntu yônsò,” nansha yêyè mwikale muyiishi anyi cyônsò ciikalaye aci, “yêyè muumushileKu Dîyì dimwe, anyi musakidileKu dîyì dimwe!” Bantu biikale beela dyumvwija dyabo bôbô biine ku Dîyì bu mudiDi difidiibwe, bakeba kuDyambishisha cintu kampanda cîndi mēmè nciyi mwambe to, kabidi, kî n'Dîyì dyanyi mēmè to; n'Dîyì Dyende Yêyè. “Ewu wasakidila, anyi ûmushila awu!”

³³ Nenukushishe, mu cikeena-kumona, tuvwa bamone baprofeta aba bapweka bu mvunda, mûmwà munûmwije, ngela meeji, kukaadi maadyalumingu mulongolongo. Cyônsò aci neciikaleku. Ntu mwambe ne: “Ikalaayi anu badisake kule ne cyôci aci.” Padibi anu ne mēmè ngudi ucilwisha, aapu kaayi Nzambi kêna mwa kucilwisha to. Kadi tuMulekeelaayi Yêyè bwalu abu mu byanza. Yêyè ngudi Ubutangila. Nwamonu anyi?

³⁴ Mpindyewu twamonu, dyalumingu dishaale, kuvwa... nyiisha pa matuku a mafesto. Nenukushishe kuvwa difesto dya mpenta. Ne pankaci paa difesto dya mpenta ne difesto dya mpungi, kuvwa kupita cipungu cile; anu matuku makumi ataanu bulubulu pankaci paa mpenta ne difesto dya mpungi. Nenukushishe matuku makumi ataanu, ôwò awu, *mpenta* udi uswa kwamba ne “makumi ataanu.” Civwa ndinyukusha dya cisekiseki, anyi dinow-. . . Mamuma a kumpala a dinowa bavwa balwa naawu. Nenukushishe tutudi tumona cyôci aci mu cimfwanyi kwôkò aku, ne mamuma etu a mu bufuki aa, miikale aleeja mamuma a Nyuma Mwîmpè adi akengela kupongolwela pa bantu.

Nenukushishe tutudi tujandula mwaba awu, ne, matuku makumi ataanu miine awu baaakapeta kudi baa Bisamba bya bende,

ne: “Nzambi mmubiikile munkaci mwa baa Bisamba bya bende cisamba bwa Dîna Dyende,” difesto dya mpenta. Nenku tudi bapicile mu difesto dile dya mpenta adi.

³⁵ Mpindyewu, mu bushuwa bwa bwalu, kuumukila ku matuku makumi ataanu awu, civwa mwa kwikala anu nsabatu mwandamutekete bulubulu. Ne nsabatu mwandamutekete ayi ivwa ileeja Bikondo Mwandamutekete bya Ekeleeziya, bwa kubiikidiibwa mu cikondo cya difesto dya cyena mpenta, dya Mpenta, bwa kubiikila cisamba munkaci mwa Bisamba bya bende bwa Dîna Dyende.

Mpindyewu, kundekeelu kwa nsabatu mwandamutekete eyi, kûkaadi kufike eku, kuvwa ne cya kwikala Dituku dya Difuta dya cibawu, divwa diikale Mpungi Mwandamutekete. Ne Mpungi Mwandamutekete ivwa mbwa kumanyisha dituku dya madilu, bwa kwalukila bwa Mulambu, anyi, Difuta dya cibawu. Nenku tudi mwaba awu tujandula, ne, Izaleela, Mpungi Mwandamutekete ivwa itangila anu Izaleela nkaayende.

³⁶ Nenku, pashiishe, civwaYe kayi mundekele nyiisha miine Mpungi Mwandamutekete ayi's. Nkaavwa mene anu pabwîpi ne kucimanyisha, mumane kulongolola ne nzubu miine ya mabalaasa ya dibwelamu, bwa kuyiisha Mpungi Mwandamutekete. Ke mêmè kwamba ne: “Kudi cintu cidid cintacisha bikole,” mûmvwà ngamba. Twêtù kutungunuka anu ne kwenza mudimu, ne Billy ne twêtù bônso, tuditacisha bwa kulongolola kantu ne kantu bwa nzubu udi ne byamu bidi bifila citaleela, bwa lumingu lulwalwa elu, bwa Mpungi Mwandamutekete; bwa kwangata matuku dikumi, anyi matuku mwandamukulu, kupeta ne nzubu wa dibalaasa wa ku tulaasa. Kadi Nyuma Mwîmpè kaakaswa kundekelaku ncyenza to, bwa kabingila kampanda, nenku mêmè kudikonka ne mbwa cinyi.

Nenku pângâbwedi bwa kusambila, mêmè kwambila mukajaanyi ne: “Ke mêmè udi ubwela ewu.” Ke mêmè kutwa binù ne meeji aanyi matooke ônsò kumpala kwa Nzambi, bwa kusambila. Ke kumbuulwilaYe ne, Mpungi Mwandamutekete ivwa midile mu Citampi Ciisambombo, ne nkaavwa muciyiishe, mu mushindu wa mutambe mfukilu. Nwamonu's, ncyanza cya Nzambi, cintu cyônsò mu kaabujima kaci. Cidi citangila Izaleela, ne tukaavwa bacyângâte mu Citampi Ciisambombo; nwênù bônso badi bacipete, mwâkenzekâ dikengesha dya beena Yuda.

³⁷ Cikondo cya baa Bisamba bya bende civwa mmu difesto edi dya cyena mpenta.

Mpungi, mu. . .yônso mmidile mu Citampi Ciisambombo. Nenku tuvwa bacyângâte dyalumingu dishaale edi, mu difesto dya mpungi, panwikala bônso baswe kucipeta. Civwa mbwa kwenza cinyi? Bwa kwipata beena Yuda, kubuumusha mu bitupa byônso bya buloba, kubaaluja mu buloba bwabo. Bidi

ne cya kwikala mwômò amu. Nenu dikangula dya Bitampi, mu Citampi Ciisambombo, ne mu . . . Mpungi Mwandamutekete mmidile mu—mu Citampi Ciisambombo.

³⁸ Mpindyewu, Mukenji wa mwanjelo wa mwandamutekete mbwa kukangula bwalu busokoka bwa Bitampi, kubiikila beena mudimu baa Bisamba bya bende baa dîbà dya dikumi ne dimwe bwa kupetabo difutu dimwedimwe dipetelebo kudi beena mudimu baa dîbà dya kumpala. Nwamonu anyi?

Mpindyewu, Yesu wakacilongesha. Wakamba ne kuvwa bantu bakwabo baakabwela mu dinowa. Bavwa bangaciibwe ku mudimu bwa difutu. Ne paakenzabo, dinda bwebwebwe, baakapeta cikondo, lufranga lumwe ku dituku. Nenu pashiishe pa dîbà nkànkalà, muntu mukwabo kubwela e kudifila ku mudimu. Nenu pashiishe pa dîbà dya dikumi ne dimwe, ke dîbà mene dya ndekeelu dya dituku, dyakalwa muntu mukwabo awu ne kupetaye difutu dimwedimwe adi divwabo bôbô bapete pa dîbà dya kumpala dya dituku; dîbà dya ndekeelu.

³⁹ Mbipwangane menemene, muvwa baamusanjeela baa dîbà dya kumpala ne Dîyì, ne Evanjeeliyo, ne Bulelela, balwe mu Dituku dya Mpenta. Pashiishe kulwaku cikondo cya mîdimà cyàkafîkîshà fitutuu. Pashiishe munkaci mwa dituku, Luther, ne Wesley, ne bakwabo, kubwelabo. Nenu pashiishe kudi ne cya kwikala Mukenji wa dîbà dya diloolo, mwine awu bwa kupeta cintu cimwecimwe aci cyakapetabo ku cibangidilu. Mukenji wa dîbà dya diloolo mbwa kwaluja cyakabidi, kwaluja cyakabidi cintu cimwecimwe aci.

⁴⁰ Nenu vulukaayi cikeena-kumona cya lumingu lushaale, cya ne paakalwa Mukaji Musela bwa kwikala . . . didyanjila kumona dya cyôci aci. Kwakajuuka Mukaji Musela mukese, mulenga, mu cikeena-kumona aci. Kadi mêmè, nciyiku nkwela meeji to; musômbe anu mwaba awu mèsù matangija pambelu. Ke Mukaji Musela ulwalwa wawa. Mêmè kuumvwa Dîyì ku luseke lwanyi, dyamba ne: “Ke didyanjila kumona dya Mukaji Musela edi.” Ke Yèyè kuseemena. Mêmè kuMumona bîmpè, muvwaYe, mulenga be, mwîmpè kwîsù, mutekete. Uvwa wenda ulonda anu dikàsà muvwaYe mwa kulonda amu, kacyi lwendu lwa mindololoooci to; wela anu bidya bile mùtù bya—bya muntu mukaji amu, mushindu utubo benda madyunda awu, bimweke anu bya bukaji. Mushindu awu ke uvwaYe wenda wenda, uvwila dya ku dyabakaji dyanyi lwa ku *elu* luseke, nenu kuyaye too ne mwänjiminiYè ku mèsù.

⁴¹ Nenu ke Yèyè kuntangija ku dyabalume, ke Yèyè kundeeja ekeleeziya ne ekeleeziya muvwayi yenda ilwa miikale ipatuka mu bikondo. Nenu, kaa, bya ciipanshi be! Nenu wa ndekeelu uvwa ncikondo cya ndekeelu cya ekeleeziya eci, biikale benda bamulombola kudi muloji. Nenu bavwa bavwale mvwadilu wa masandi wa dikema, umweka wa wendesha ne ku mwoyi! Nenu

biikale benda balonda dikàsà dya dijekeja dya nyima ne dya mujiki wa rock'n'roll. Nenku bakaji abu biikale benda badikupa mu dijekeja dya nyima, bakwate anu dibeji, difiikuluke, dya lubombo, dibyälè- . . . Diikala difiikuluke didi pankaci paa ditooke ne difiike, ndiikala dya diseeswishangana. Diikala difiikuluke kaditu nî nditooke nî difiike nansha. Ndiikala dya diseeswishangana. Ne dibeji dya dimweka bu difiikuluke, badikwate kumpala kwabo, bavwale jipè ya hùlâ myenze bu idi ne mampinda makwate kumpala kwabo aku, biikale anu butaka bwetu bwa pulupulu ebu kuumukila mu cifuka too ne kuulu. Nenku biikale benda lwendu lwa. . . anyi ku cikemu, anyi benda bajeekeja nyima, ne benda benza maaluu a macimbu ne mujiki awu, benda baseemena. Yèyè ne: “Ke ekeleeziya nyawu.”

⁴² Nenku paaluye kupicila pâmvwà apu, mwoyi kadi kwenza anu bu wangimanyi's. Mémè kudyambidila ne: “Piikalabi ne ke citudi tuteeta kuleeja Kilisto, bu ne ke Mukaji Musela? Didifila dyònsò ne byònsò bidi bantu benza ebi, bwa kuditacisha bwa kupatwila Kilisto Mukaji Musela; mwine awu wa mmwenekelu wa ciipanshi, wa manyaanu, ne wa bukooya wa mushindu wawa bwa kwikalaye Mukaji Musela wa Kilisto?” Kadi kunsamishabi mwoyi bibi be.

⁴³ Nenku pavwaye upita apu, paanyima paa yèyè. . . Ufumina lwa kumpala kutuwwa biimanyine aku, uvwa mukwate dibeji lwa kumpala kwende aku, wenda ujeekeja nyima, watwa kumpala watwa paanyima, wadikupa eku katanci wadikupa eku, pavwaye wenda uya apu, mushindu udi maja a cyena leelu adibo baja matuku aa, wenza mubidi wende awu bu ne udi munkaci mwa kwenza cyenzi cya masandi pavwaye wenda wenda apu.

⁴⁴ Mémè ncyèna mwambule bujitu bwa bintu ebi to. Ndi mwa kwamba anu cimvwà mumone. Ne Nzambi bu Mulumbulwishi wanyi, kadi civwa ng'ekeleeziya wa États-Unis.

⁴⁵ Mpindyewu, pavwaye upita apu, citupa cyònsò cya mwongo eci kacivwaku ne kantu nansha kamwe kacijike nansha kakese to. Nenku paakapitaye, mémè kadi kudyumvwa mutekete ne mu maboko ne bintalale ne ku mwoyi.

⁴⁶ Pashiishe Yèyè ne: “Mukaji Musela nealwe cyakabidi mu didyanjila kumona.” Nenku ke Mukaji Musela ulwalwa ewu paanyima paa mukaji awu, Mukaji Musela ne mmwenekelu anu umweumwe wa bwena uvwa mupite ku cibangidilu awu. Ke mwoyi wanyi kutupikawu ne disanka, dya kumanya ne nekwikale Mukaji Musela. Ne Yèyè awu neikale mwenza ne cintu cimwecimwe aci, ne muvwadika cintu cimwecimwe civwa Yèyè uvwa ku cibangidilu awu muvwadika. Yèyè ke wíkala ne cya kubiikidiibwa.

Ne ndi mumanyi ne m'Bulelela. Cyòcì kaciyi cilelela to, nenku cikeena-kumona cyònsò cinkaadiku mumone kwònsò

eku ncyá mafi. Ne muntu yònsò mmumanye, ne, kakwenaku kantu nansha kamwe kakaadi Ye mungambile kakayi Bulelela to. Bikaadi anu byenzeke, anu . . .

47 Nénku nudiku mwa kumona, mwaba ewu, bukooya bwa ekeleeziya wa cyena leelu ewu, mwikale udyamba mudiye “ekeleeziya” anyi?

48 Bu muvwa muntu kampanda wamba dîngà dituku; Mwaneetu Ruddell, mwaneetu wanyi wa mushinga mukole, udi mpindyewu mwimane mweyemene ku cimanu wawa. Aci, uvwa yêyè mucimone bu mutoloku ku mucu wa mvinyo. Nénku tuvwa tukokangana pa cyôci aci dituku adi. Nénku Mwaneetu Ruddell uvwa mutacishiibwe kudi ngiikadilu ya cikondo eci ne dyumvwa dya nyuma mu ekeleeziya ya leelu eyi, mukaadi nyuma awu mubange kwikala wenda upweka. Bambi bafumina myaba yònsò, ne miyiiki ya babidi pambelu apa, bakonka ne: “Cyènzèkì ncinyi?” Ekelekele!

49 Mwaneetu Ruddell kungela lukonko ne: “Badi ne mwoyi ku nyuma wa Sataana, anyi ncinyi?”

50 Mémè ne: “To, mutoloku ùtu ne mwoyi ku bukole bwa ku mucu wa mvinyo.” Udi ne mwoyi, bwalu cimuma cya didimà dya mpusu, didimà dya mpusu nediikolele ku mucu wa orange; kadi kawakukwama bimuma bya orange to, nansha mudiwu ne mwoyi ku mwoyi wa mwine mucu awu.

Nénku ekeleeziya, wa mu dîná, udi anu mutoloku mulamakaja cyanaana, mwikale ne mwoyi ku dîná dya ntendeleelu, mu dîná dya ekeleeziya. Katolike ne Mishònyì, mitoloku cyanaana, ikoka . . . bukole bwa ku mucu wa Mvinyo; kadi miikale ikwama mamuma a bidiyi yôyi abi, mbwalu kabatu bakudimune mucima to. Kabavwa mu ndongamu wa ku cibangidilu, mudyanjila kulongolola wa Nzambi to, ke bwa cinyi bikengela babenge kwitabuuja Dîyì ne bakwame mamuma a múngà mushindu. Muci mulelela ne mwena diiná awu, mu muji wawu amu, uvwa mudyanjila kulongolola bwa kukwama bimuma bya orange ku mucu wa orange.

Yesu wakamba ne: “Mémè ndi mucu wa Mvinyo; nwènù nudi matamba.”

51 Kadi mucu awu wòwò mupatule ditamba dikwabo, nedikwame mamuma a ku cibangidilu a mucu awu. Nénku bikengela kwenzeke dyalujulula dya bintu byònsò, anu kundekeelu menemene kwa mucu wa Mvinyo awu. Bikengela kwikale, kulwe, dyalujulula, Bukènkè bwa diloolo bwa kukenkeshila Cyôci aci ne kuCilongolola. Kadi cyapatukila mu mucu wa Mvinyo, kî ndingumba dilamakaja mu Wòwò awu to; kadi dipatula dya ku cibangidilu dya Dîyì. Bikengela Bulwe bwa dîbà dya diloolo. “Nénku nekwikale Bukènkè mu dîbà dya diloolo.” Bikengela Bukènkè bwa kuDibobesha.

⁵² Monaayi mudi Dîyi diikale dipwangane! “Dituku diikala kadiyi mwa kubiikidiibwa ne ndituku anyi mbufuku.” Cimuma kacyna mwa kuboba piikala dîbà kadiyi dicibobeshe to. Nansha wêwê muyiishe bintu byâbûngî bishi, ciwenza cyônsò aci, kacyenaku mwa kubobeshiibwa to, kacyenaku mwa kumweneshiibwa to, kacyenaku mwa kushindikiibwa to; amba anu kudi Yêyè Wâkamba ne: “Mêmè ndi Bukênkè bwa baa pa buloba,” Dîyi. Pa nanku bikengela kulwe Bukole, Nyuma Mwîmpè Yêyè mwine, bwa kubobesha, anyi bwa kushindika, anyi bwa kujaadika, anyi bwa kumwenesha ne cyakadyanjilaYe kwamba necyenzeke mu dituku edi. Bukênkè bwa diloolo ke budi bupatula cyôci aci. Ndîbà kaayi edi’s we!

⁵³ Mukaji Musela kupitaye mu mwaba umweumwe uvwaYe pavwaYe ku cibangidilu awu. Kadi mvwa muMutangile pavwaYe upatuka mu dikàsà, nteeta bwa kuMwaluja. Mpindyewu, tudi bafwanyine kwamba byâbûngî pa bintu ebi, pa dituku ditudi ne mwoyi edi.

⁵⁴ Mpindyewu, Hoshea wakamba, mu 6.1 ne: “Alukilaayi kudi Mukalenge.” Nwavulukaayi ne, wakamba ne nebabatangalaje, ne baakabatangalaja. Yêyè ne: “Nebaalukile kudi Mukalenge, paanyima paa bôbô bamane kubatangalaja, ne Yêyè, neabaswike bwanga pa mputa.” Tangilaayi numone: “Alukilaayi. . .Nebabatangalaje; diibîdi. . .Baakabapandulula, ne baakafofomijiibwa.” Ke cyakenzeka menemene ncyaci. “Yêyè neâtwôndôpè, ne neatuswike bwanga pa mputa.”

Bu mudi Yehezekele 37: “Mifuba myûme, cibandabanda cyûle tente ne mifuba myûme.” Yehezekele wakamona cyôci aci, dipingana dyabo dya cyakabidi.

Nenku tangilaayi bîmpè, Hoshea wakamba ne: “Paanyima paa matuku abidi!” Paanyima paa matuku abidi Yêyè uvwa mwa kwalukila kudibo. “Neâtwâkidilè ne neatupe, neatuvwije cyakabidi ne mwoyi.” Mpindyewu, *kuvwija cyakabidi ne mwoyi* kî mbwena kwamba ne “dibiika dya ku lufu” to. *Kuwvija cyakabidi ne mwoyi*, mwaba awu, mmwaku umweumwe udibo bambe mwaba mukwabo wônsò, ngâfumu ku diwutangila, udi uumvwija ne, “ditabuluja.” “Neatuvwije cyakabidi ne mwoyi paanyima paa matuku abidi.” Aci ncifwanyine kwikala ne: “Mu dituku diisâtù Yêyè neatuvwije cyakabidi ne mwoyi, paanyima paa Yêyè mumane kututangalaja, ne kutufomija, ne kutusunsula.”

⁵⁵ Nudi bamanye ne, beena Yuda baakafofomijiibwa mu kiipacila mene kaa ne twêtù twâpeta mwa kumona. Baakapanduludiibwa, ne kutangalajiibwa, bôbô bu ditunga, ne kubengabo Maasiya wabo; bwa twêtù twamona mwa kwakidila Maasiya, bwa kwikalaku cisamba civwa mwa kubiikidiibwa munkaci mwa Bisamba bya bende bwa Dîna Dyende.

⁵⁶ Mpindyewu, mulume ngudi ulwa, nenku mukaji wangata dînà dyende. Bantu baa Bisamba bya bende bafofomija aba badi kabayi mwa kumona Dînà adi, “Mukalenge Yesu Kilisto,” mu dibatiiza! S’mbwalu bukole be, kadi bikengela biikale mushindu awu. Beena Yuda, bivwa bikengela bwa—bivwa bikengela bwa kabamonu aci to. Kudi anu umwepele udi mwa kucimona; ngewu udi mudyanjila kulongolola bwa kucimona. Bwa cyanaana, kwadyakucimonaku to.

Beena Yuda kabavwa mwa kumona ne ke Maasiya wabo awu to. Nenku, nansha nanku, bavwa bamanyi baa mabàla ne bantu balongele Nzambi mu tulaasa, bantu baa malonga mamanyiike bikole, biikale babala Bible anu umweumwe unudi nubala ewu. Mpindyewu, paanyima paa bamane kutumanyishaci, twètù tudi mwa kucimona bitooke tòò, bwa ne uvwa Maasiya. Kadi, bôbò kabavwa mwa kucimona to, nansha leelu ewu kabeena mwa kucimona to. Bakaavwa bambe mu ciprofeta ne bavwa ne cya kufofomijiibwa, bôbò paabo.

⁵⁷ Ekeleeziya, mu dituku edi, bakaavwa bambe mu ciprofeta ne neafofomijiibwe, bwa kubengaye Mukenji wa dîbà dya diloolo. Bwakabuulwibwa 3 mmwambe nanku ne: “Udi mukengeledi, mwena dikenga,” monaayi bîmpè ngiikadilu wa mukaji musela diloolo adi, anyi wa ekeleeziya, “butaka, mpofo, kadi kuyi mumanye to.” Mukalenge Yesu, wikaleku neetu luse! Bible ke udi mwambe ne yêyè uvwa “butaka.” Nciwaku mucimone to too ne mpindyewu ewu. Ekeleeziya wa Laodikiya uvwa butaka. Ne paakamwenekaye diloolo adi, uvwa “butaka,” nciyiku mwa kucimona to, “ne kayi mumanye to.”

⁵⁸ Kaa, mushindu mwine ûndi ne kusakidila’s we! Mushindu mwine, kabylene bikemesha patudi ne kusakidila kwa manza tente’s! Ndi ndyumvwa ne katwena ne kusakidila kukumbane to bwa bintu bidi Nzambi munkaci mwa kutumanyisha.

⁵⁹ “Butaka.” Nenku bikeena-kumona mbyambe, mbindeeje ne yêyè uvwa butaka kadi kayi mucimanye to, ne “mpofo.” Anu muvwa Izaleela mufofomijiibwe bwa baa Bisamba bya bende baamona mwa kubwela, mpindyewu baa Bisamba bya bende mbafofomijiibwe bwa Mukaji Musela amone mwa kuumushiibwa mu njila ne Izaleela amone mwa kwakidila difesto dya Mpungi. Anu mudibi menemene!

⁶⁰ “Paanyima paa matuku abidi Yêyè neatuvwije cyakabidi ne mwoyi, anyi kutupa ditabuluja, kutusangisha, beena Yuda,” ndi ngakula bwa dîbà dya Mpungi eyi mpindyewu. Ne Yêyè . . . “Nenku netwikale ne mwoyi kumpala Kwende, anyi kwikala ne Mwoyi wa Cyendelele. Nwamonu’s, netwikale kumpala Kwende.” Bible mmwambe mwaba ewu mu Hoshea, ne: “Nenku netwikale ne mwoyi kumpala Kwende; Mwoyi, kwikala ne Mwoyi kumpala Kwende.” Aci m’Mwoyi Wende Yêyè mwine, Mwoyi wa Cyendelele, “kwikala ne mwoyi kumpala Kwende.”

“Mukaji udi mu nsòmbelu wa bisankasanka mmufwe piine padiye ne mwoyi apu.” Pa nanku twètù. . . wakalaya ne Izaleela neikale cyakabidi ne mwoyi kumpala Kwende. Ukaavwa mufwe, pa kutangila mudi maalu, ne ku difesto dya mpenta.

⁶¹ Tangilaayi mpindyewu, ne ntema. “Pashiishe paanyima paa matuku abidi.” Mpindyewu, aci kî mbwena kwamba ne mmatuku etu abidi a mèbà makumi abidi ne anaayi aa to, bwalu kukaadi. . . Aci cyakenzeka kale wawa, kukaadi nkama yàbûngi ya bidimu. Nwamonu anyi? Civwa ciswa kwamba ne, “matuku abidi bwa Mukalenge,” paanyima paa bidimu binunu bibidi. Mpindyewu, nudi bamanye ne kukaadi kupite cikondo bule kaayi kuumukila pa diine dîbà adi? Kukaadi kupite bidimu binunu bibidi ne nkama mwandamutekete kubangila piine apu, bwalu mu Hoshea mwaba ewu muvwa mmu cidimu cya 780 kumpala kwa Kilisto. Cidimu cya 1964, nwamonu’s, cikaadi cintu cya bidimu bipite pa binunu bibidi ne nkama mwandamutekete. Yèyè wakamba ne: “Paanyima paa matuku abidi, mu dituku diisâtù, Yèyè neatuvwije cyakabidi ne mwoyi, ne neatupe Mwoyi kumpala Kwende.” Ke Mpungi yenu ilwalwa nyaayi. Ke dyôdi adi dîbà ditudi ne mwoyi edi, dituku ditudi ne mwoyi.

⁶² Mpindyewu, mbabatangalaje, babafomije, babasangishe, nenku bakaadi baye ntanta mu dituku diisâtù. Nudi nuumvwa aci anyi? Bavwa babatangalaje, babùmùshè mu Palestine, pa buloba bujima. Bavwa babafomije, bwa kubengabo Maasiya. Kadi mpindyewu bakaadi babasangishe mu buloba bwabo, badilongolole bwa Mpungi, bwa kujingululabo Difuta dya cibawu.

Bu mudi Bible mwambe ne: “Paakidilabo Cyôci aci, ne paa Musanganabo ne bibangu bya mputa ya misonso,” paanyima paa Ekeleeziya mumane kwangaciibwa, “nenku nebâmbè ne: ‘Udi mupete ebi bibangu bya mputa penyi?’ Yèyè kwamba ne: ‘Mu nzubu wa balunda Baanyi.’” Ke kwambaYe ne: “Nebâdyâbanyè, famiye ne famiye, ne nebèlè mbila ne nebadile myadi, munda mwa matuku, byenze anu bu famiye mufwishe mwanende umwepele mulela wa balume.” Nwavulukaayi ne, difesto dya Mpungi adi ke divwa ne cya kwenza cyôci aci. “Kudila, kwenza madilu bwa Mulambu mushipa,” bwalu bôbô baakaWubenga.

⁶³ Bakaadi mu buloba bwabo. Bavwa babatangalaje, babafomije, kadi mpindyewu bakaadi babasangishe. Nenku byônsò abi bivwa mmu Citampi Ciisambombo aci, Mpungi yabo Mwandamutekete. . . mmidile bwa kubasangisha kaaba kamwe, Mpungi Mwisambombo. Wa Mwandamutekete ke “Mpungi Munene awu,” bu mutwâbimònu mu dyalumingu dishaale. Mpungi Mwisambombo mmudile mu Citampi Ciisambombo. Anu menemene mudi Citampi cyetu Ciisambombo cikanguke, maalu ônsò musangu umwepele; kadi, yabo bôbô mmidile yônsò

musangu umwe; ke bwa cinyi, tukaadi benze bidimu binunu bibidi mu difesto dya mpenta.

⁶⁴ Mpindyewu, bidimu binunu bibidi ne nkama mwandamutekete kuumukila ku ciine cikondo aci. Mmwambe ne: “Mu dituku diisâtù, netusangishiibwe cyakabidi. Paanyima paa matuku abidi, mu dituku diisâtù, netusangishiibwe cyakabidi, ne netupete Mwoyi kumpala Kwende.” Nudi numona mulayi awu anyi? Dìbà anu pa dyôdì menemene difunda ku cimanu. Tudi tumona mwaba utudi twikalangana ne mwoyi.

⁶⁵ Mpindyewu mu buloba bwabo, bindile difesto dya Mpungi, anyi dijingulula dya Difuta dya cibawu, ne dindila dya Dilwa, bwa kwenzabo madilu a dibenga dyabo dya musangu wa kumpala dyakabengabo Cyôci aci. Badi mu buloba bwabo mbwa Cyôci aci, bindile. Ncinyi ciikalabo bwônsò bwabo ne cya . . . Byônsò bikaadi biteekiibwe pa myaba yabi.

⁶⁶ Mêmè bu mwambi wa Evanjeeliyo, ncyêna mwa kumona cintu nansha cimwe cidi cishaale to pa kuumusha anu diya dya Mukaji Musela. Ne bikengela Mukaji Musela kwangaciibwaye kumpala kwa bôbò kujingulula ciikala cyenzeke. Bavwa babaswike, batangalaja . . . Ndi nswa kwamba ne, bavwa babatangalaje, babafomije, nenku mpindyewu bakaadi babasangishe. Cidi cishaale ncinyi? Mbwa Mukaji Musela kuumushiibwaye mu njila. Bindile diya dya Mukaji Musela, bwa bapofeta baabo baa Bwakabuulwibwa 11 bamone mwa kubabiikila ku difesto dya Mpungi, bwa kubafikisha ku dijingulula dya cidibo benze.

⁶⁷ Vulukaayi ne, anu pankaci menemene paa Bitampi abi, ke paakalwa Citampi Ciisambombo. Ne kuvwa bantu binunu lukama makumi anaayi ne binaayi, basungula ne babiikila. Ne pankaci paa Mpungi Mwisambombo ne wa Mwandamutekete, Bwakabuulwibwa 11 udi umweneka anu mwaba awu menemene mwikale ukumbanangana ne Citampi Ciisambombo.

⁶⁸ Bwa kwenza cinyi? Civwa ne cya kwenza cinyi? Nenku eci civwa mbwa kupatula bantemu babidi abu, Môsà ne Eliya, bapofeta. Bwalu, beena Yuda bôbò batu biitabuuja bapofeta anu baabo bôbò. Ne nebapatuke ne cimanyinu cya bapofeta, ne mudimu wabo newikale wa mupofeta, bwalu ncyakenzabo menemene.

Ndi ndeeja cintu cimwe eci, cya ne, muntu, paudi ufwa anyi nî ncinyi cyônsò, paudi ushiyangana ne buloba ebu, ngiikadilu webe kêna ushintuluka to. Pawikala mwena mashimi mpindyewu, newikale mwena mashimi kwaka. Pawikala mwena cimfiikaamunda panwapa, newikale anu mwena cimfiikaamunda kwaka. Pawikala mwena mpata panwapa, udi mufwanyine kwikala mwena mpata kwaka. Nwênù balume ne bakaji, dìbà dikaadi dikumbane dya nwênù kudinyukulula ne

kudikenketa, bwa nwênù kumona ne tukaadi biimanyine penyi, bwalu lufu kalwena lushintulula aci to.

⁶⁹ Bôbò abu's bakaavwa baye kukaavwa bidimu binunu bibidi. Môsà ukaavwa muye kukaavwa bidimu bitwe ku binunu bibidi ne nkama itaanu, ne Eliya kukaavwa... Bidimu bu binunu bibidi ne nkama itaanu nkukaavwa Eliya muye, ne Môsà ukaavwa muye yêyè, kadi monaayi ne mbaaba baalukila ne ngiikadilu anu umweumwe awu ne biikale benza bintu anu bimwebimwe abi.

Lufu kalwena lushintulula cintu nansha cimwe kudi muntu to pa kuumusha anu cisòmbedi cyende. Kalwena lushintulula ngiikadilu webe to. Kalwena lushintulula diitabuuja dyebe to. Kalwena lushintulula cintu nansha cimwe mu wêwè to pa kuumusha anu cisòmbedi cyebe.

⁷⁰ Pa nanku, ngiikadilu webe mmutangija penyi mu dinda emu! Pawikala mwena mpata ku Dìyì dya Nzambi, udi mufwanyine kwikala mwena mpata kwaka. Nansha wêwè mwikale munsantu wa bishi, ne nsòmbelu wa bishi, ne mwikale ne nsòmbelu mwîmpè wa bishi, kabyena mwa kukushintulukaku nansha kakese to paudi ufwa, anu cisòmbedi cyebe. Nenu pawikala kuyi mwa kwitaba Dìyì dya Nzambi mu kaabujima mushindu udiDi difundiibwe to, kwèna mufwanyine kwitaba Kwaka to; pa nanku, kutacishi meeji ebe to, wêwè mwine kwakwikala Kwaka to.

Bikengela wêwè kuDiitabuuja mu kaabujima kaaDi, mu bukole bwa dishindikibwa dyaDi ne mu dibuulula dya ne Didi cinyi, pa dîbà adi kaayi udi ushaala citupa cyaDi. Anu Dìyì Dyende nkaayaadi ke diikalaYe mwa kubiisha ku lufu, bu mwakabiishaYe Dìyì Dyende ku bafwe mu dinda adi dya Paasaka wa kumpala. Anu Dìyì Dyende ke dyakapatuka, ne aba baakafwa mu Dìyì Dyende, mwitabuuje Dìyì Dyende ne mushindike Dìyì Dyende.

⁷¹ Monaayi, mpindyewu, aci nkacya kukaadi bidimu binunu bibidi ne nkama mwandamutekete. Monaayi, bavwa babatangalaje, bavwa babafomije, kadi mpindyewu bakaadi babasangishe. Mpindyewu, cintu cidi cilonda ncyà ne badi ne cya kupeta Mwoyi.

⁷² Ne baa Bisamba bya bende bakaadi babiikidiibwe bwa kupatuka. Mukaji Musela ukaadi mudilongolole. Dyambwibwa dikaadi pabwîpî. Tudi mwa kufikaku ku dyumvwa aci anyi? Tudiku bulelela mwa kwitabuuja aci anyi? Mbwalu budibo balonde anyi? Mbwalu bukwatakaja anyi, bwetu twètù? Ncintu kampanda ciikale cyumwika cilelela anyi? Ncintu citudi, twètù baa pambelu aba, mwa kwitabuuja anyi? Anyi ncintu ciikale munda mwetu, ciikale citupa cyetu, ciikale ne mushinga mupite ne wa mwoyi bwetu twètù? Ndwidi kaayi lutudi tuleejamu, mu

dinda emu, mu tabernacle emu? Vulukaayi ne, anu kasumbu kakese kaa mikooko ke kiikala mwa kuCyakidila.

⁷³ Mpindyewu mu buloba bwabo amu, bindile Mpungi. Mpindyewu mbindile diya dya Mukaji Musela mukese ewu, bwa Bwakabuulwibwa 11 amone mwa kuula. Cikondo cya ekeleeziya cyajiki; Bitampi bikaadi bimane kukangudiibwa, biikale bijaadika civwabo bashiye ku luseke mu cikondo cya ekeleeziya, ne Mukenji mmumane kufidiibwa. Izaleela ukaadi mu cyalu, aleluuyah, mudilongolole bwa difesto dya Mpungi.

⁷⁴ Kaa, nwênu badi mu matunga makwabo munwikala mwa kuteeleja mukaba wa mêyi ewu, kwenaku mwa kutabuluka anyi, wêwè mwaneetu wanyi? Anyi, Cyôci aci cidi cikufomija anyi? Udi mufwanyine kuCiimansa kadi kuCiinyika dîna ne nciprofeta cya mashimi anyi? Paabi, s'nCishindikiibwe anu kumpala kwebe menemene, kudi baa pa buloba, kudi cikondo, kudi bisamba, ne kudi Nyuma Mwîmpè wâkaCifûnda awu. N'Cishindikiibwe, ne kudi maalû a mu bufuki, ne kudi maalû a nyuma, ne kudi maalû a bintu bya mubidi ewu. Byônsò bituYe mwambe mbyûle ne bijaadikiibwe.

⁷⁵ Izaleela mu buloba bwende; mbabasakemu, biikale basakiibwe, benze bu mikooko. Mbwa ya diitu kubalumbata kadi kubanyeemesha lubilu bwa kwalukilabo bwa bakasombè ku maci talala, mu buloba bwabo sunganga. Vulukaayi ne, Izaleela batu bamulaye bwa kubeneshiibwaye anu yèye usanganyibwa mu buloba bwende. Nzambi katu ubeneshaku Izaleela pambelu paa buloba bwende to. Abraham wakapatuka mu buloba abu, wakapiishiibwa. Muntu yônsò udi ushiya buloba abu udi upiishiibwa. Nzambi udi mwa kubenesha Izaleela anu padiye ushaala mu buloba bwende, ne ke mudiye usanganyibwa mpindyewu bu ditunga. Ne Ekeleeziya wâbiikidiibu; mmwindile anu Dyambwibwa, dya Mukaji Musela wîkala ne cya kuumushiibwa.

⁷⁶ Bitampi bikaadi bikangula. Bikaadi bimana kutubuulwila. Tudi tumona byakashiilabo mu njila. Wêwè udi ujinga kukokangana ne kwelangana mpata pa dimiinu dya nyoka, ne dibatiiza dya mu mâyi, ne bikwabo, udi mufomijiibwe kuyi mumanye to. Nzambi wa buloba ebu mmukufomije, bwa kumonu Cyôci aci to, ne kwêna mumanye to. Ndi nkema mûndi mupete ntatu bûngi cyanaana mu dinda emu, ndwangana mvita ne tunyoomanyooma etu!

⁷⁷ Pa nanku baprofeta baabo badi mwa kusokolodiibwa mu dituku dya ndekeelu edi; katwena mwa kucyenza to, ku Mpungi, ya . . . ku Difesto dya Mpungi.

⁷⁸ Yèye wakamba, kudi Hoshea ne: “Ndi mupempe.” Tangilaayi mpindyewu, Izaleela ngudiYe wambila ewu. “Ndi mupempe,” anyi mu mushindu mukwabo ne: “Ndi mubakose, mubakosolole, ku mêyi a baprofeta.” Mushindu awu ke udi Nzambi wenza

cisamba Cyende. Wakabakosolola kadi kubuumusha kudi bisamba bikwabo. Ne cinyi? Mwele Wende wa nkànzà, Dìyì Dyende. Wakabakosa, cisamba Cyende, kucyumusha kudi bisamba. Wakakosa cisamba Cyende kucyumusha kudi bisamba, ku mēyì a baprofeta, Dìyì Dyende dishindika.

Ke mudiYe mukose Mukajende Musela kuumusha ku mangumba, ku Dìyì Dyende; dilaya kudi Maalaki 4, mu dituku dya ndekeelu. Mmukosolole Mukajende Musela, muMupempe kuumusha kudi ekeleeziya mikwabo! Mupempe Mukajende Musela!

⁷⁹ Mmukose muumushe, baprofeta Bende; ku mēyì, ku baprofeta Bende, ne Dìyì divwa dikosa Izaleela adi. “Tapulukaayi ne bakwabo baa kudibo abu.”

Tangilaayi pavwabo bajinga kwenza bu bakwabo. Bòbò kulwa kudi muprofeta, Samwele. Yèyè ne: “Nkaadiku munwängàte mfranga yenu anyi? Nkaadiku munwàmbile bwalu kampanda, mu Dìnà dya Mukalenge, kabuyi bùle anyi?”

Bòbò ne: “To, aci, aci ncyà bushuwa, kadi tudi anu tukeba mfumu.”

⁸⁰ Mushindu awu ngudi ekeleeziya myenze. “Kaa, tudi biitabuuje Dìyì. Ndilelela, kadi, udi mumanye, badi bamba ne bivwa bikengela anu kwenza *cikampanda*.” Nansha bòbò bambe cinyi. Dìyì ke didi dilelela!

Mbindile. KubakosaYe kubuumusha, ku mēyì a baprofeta.

⁸¹ Tudi dībà kaayi, mwaneetu? Tudi dībà kaayi, mwambi? Udi umona dībà ditudi mu dituku, ne cimanyimu cyùdi mwinshi mwaci aci anyi? Udi mwa kucyumvwa anyi? Udi mucimone anyi?

⁸² Myaba yònsò mpindyewu, kakwena ditabuluja nansha. Bònsò badi munkaci mwa kudilakana, bambi badila myadi. Mvwa mbala cimwe cya ku—ku bibejibeji bidi bitambe kumanyika citu cilwa mwaba ewu ku ekeleeziya eku, cibejibeji cìmpè be. Ntu mumanye mufundi, ne ntu mumanye beenaci. Mbantu badi ne difwana dya Nzambi, bìmpè be, Mwaneetu wa balume ne Mwaneetu wa bakaji Moore, cya *Mukobodi Wa Dilwa Dyende*. Cimwe cya ku bibejibeji bidi bitambe bwìmpè mu budimi bwa bwambi, *Mukobodi Wa Dilwa Dyende*. Kadi mbapange too ne cya kufunda ciine pa kuumusha cya ne: “Jilaayi byakudya, sambilaayi! Jilaayi byakudya, sambilaayi! Elaayi mpungi! Angataayi...” Mbanganyi batu baacibala? Nudi bamanye. Nutu nucimona dībà dyònsò ne: “Jilaayi byakudya, sambilaayi! Jilaayi byakudya, sambilaayi!” Ke cyònsò cyùdi uumvwa ncyaci. “Jilaayi byakudya, sambilaayi! Netupete mbangilu munene wa dituku! Kudi cintu cinene cìikalà mwa kwenzeka! Nwènù bònsò, sambilaayi, sambilaayi, sambilaayi! Dībà kì ndyanji kupita bya bikole to!”

⁸³ Badi benza nanku bwa cinyi? Badi benza nanku bwa cinyi? Badi bakeba ditabuluja dinene. Badi badila myadi, beela meeji ne nekwikale ditabuluja. S'mbantu anu beetu baa bîmpè aba. Mbwa cinyi nanku? Cidibo benze ncinyi? Kî mbajingŭlŭle ditabuluja dya Mukaji Musela to. Nwamonu anyi? Bu mudibo ne mbeena Kilisto, badi bumvwa dikokiibwa dya dîbà ditudi, kadi kabayi bajingŭlŭle cidi cyenzeke to. Ke cidi cibafikisha ku didyumvwa mushindu awu. Mbamanye ne kudi cintu cidi ne cya kwenzeka, kadi, monaayi, badi bôbò bacikeba ciikale kule mu matuku acilwalwa, bwa kulwaci, paaci cimane kwenzeka anu ku luseke lwebe mene.

⁸⁴ Cintu cimwecimwe aci ncyakenzabo mu matuku a kale. Bavwa biitabuuja mu Maasiya uvwa ne cya kulwa. Bavwa biitabuuja ne kuvwa mudyanjididi uvwa ulwa. Kadi bwalu paabu bwikale mu mikolo yabo mene, kadi bôbò kabayi bamanye to. Kabayi mwa kubujingulula to. Bavwa biitabuuja ne nekulwe mudyanjididi uvwa mwa kudyanjidila Maasiya, cibi bôbò kumukosa mutu. Kushipabo Maasiya wabo mwine, bu muvwa ciprofeta cyambe ne bôbò nebafofomijiibwe. Hoshea nguvwa mwambe nanku.

⁸⁵ Nenku Nyuma umweumwe awu, uvwa mwakwile kudi Hoshea awu, kwakwilaye kudi Yone wamba ne ekeleeziya mu matuku a ndekeelu aa neikale “butaka, ne mpofo, ne neaMwele pambelu paa ekeleeziya.” Mbabange kumona dyula dya biprofeta abi. Kadi, bu mudibo mwômò amu, badi bafika ku dyumvwa ne kudi cintu kampanda cidi ne cya kwenzeka. Kabeena anu bacyumvwa to. Kabeena bafika ku dicyumvwa to. Bafwanangane bikole ne beena Yuda baa kale abu; Laodikiya mufofomija; mabanji, dimanya dya Nzambi dya mu tulaasa, biikale lukuna ne Ekeleeziya, biikale lukuna ne Mukenji. Tangilaayi numone muvwa beena Yuda abu ne lukuna ne Yone. Tangilaayi numone muvwabo lukuna ne Yesu, pende Yêyè mene nguwabo balaka mukana bamba ne ke Uvwabo bindile's.

[Byamu bya dibandisha naabi mêyi bidi byela monzu—Muf.] Ngela meeji ne tudi booshe tunshinga twa midilu. Ngela meeji ne cidi cijima bisanji bidi bikwata mêyi pa mikaba, byôbî kabidi. Kacyena cibijima to. Mbîmpè.

⁸⁶ Bavwa lukuna ne kudi Mukenji.

Cidî cyènzekà, cidi ciya lubilu lukole menemene; muntu ne muntu wa kunudi bônso udi cyamu cya cifila luuya. Kamwena mushindu wa kulama ekeleeziya mu luuya pa lwôlò menemene mu byôbî abi to, mu mêbà awu. Mbwalu, nudi numona, muntu ne muntu wa kunudi udi mu degrés makumi citeema ne mwandamukulu ya BTU, pa ciibidilu. Nenku kanwena anu nushaala basômbe mushindu awu to; nudi nupatula anu luuya dîbà dyônso edi. Kudi lupeepe búngî bukumbane munda emu

bwa kutalaja mwaba ewu. Kadi, ne cyamu cifidi cya luuya ciikale citambula, kanwena—kanwena mwa kukumbana to.

⁸⁷ Monaayi, ne lukuna! Kadi, mpindyewu, anu muvwa beena Yuda baa kale, bafofomija! Badi mu Laodikiya. Badi “butaka, beena dikenga, bakengeledi, kadi kabayi bamanye to.” Dituku dya mabanji, malongesha manene a maalu a Nzambi a mu tulaasa, malonga manene, nenku mpindyewu bakaadi lukuna ne Mukenji. Kî mbaswe kwikale dipetangana nansha dikese pankaci paabo ne Wôwô awu to, anu muvwabi menemene kale wawa mu matuku avwa Yesu wa mu Nazaleete pa buloba.

⁸⁸ Kabingila kavwa kenze ne bantu, mu dituku dya Noa, kababwedi mu bwâtù, mbwalu kabaakajingulula nî mmukenji nî mmusanjeela. Ke kabingila kamwepele kaakabafwishisha, mbwalu kabaakajingulula dîbâ divwabo ne mwoyi to. Kabaakajingulula ne Nzambi uvwa ne cya kulwisha mpekaatu bu muvwaYe mulaye ne Neamulwishe to. “Uvwa ne cya kubutula bantu, pa buloba bujima.” Ukaavwa mumane kucyamba mu ciprofeta. Uvwa wambilamu. Ne leelu ewu Yêyê udi wambilamu anu mushindu umweumwe wakambaYe musangu awu awu.

⁸⁹ Kadi bantu, pamutu paa kwikalabo mu dyumvwangana ne Noa, yêyê wakangaciibwa bu muntu wa mu cisuku. Kabaakiitabuujja ne yêyê uvwa muprofeta to. Nudi bamanye, Yesu, Yêyê mwine Nkaayende, wakatwambila mwakasekabo mu matuku a Noa, bamwelulwila, bamwinyika ne mmukoleshi wa maalu ne bikwabo. Kadi kabaakajingulula dituku dyabo to. Kabaakajingulula dituku to. Kabaakajingulula cimanyinu to. Kabaakajingulula mukenji to. Kabaakajingulula musanjeela to, kadi baakamuumusha munkaci mwabo kadi kumuseka. Yesu wakamba ne: “Anu mwakadibi mu matuku a Noa!”

⁹⁰ Ne Izaleela mu buloba bwende, ne byônsò biteeka pa myaba yabi mpindyewu, ne Mukenji udi munkaci mwa kuya kumpala anu mu byôbi menemene, mmu dituku kaayi mutudi emu, mwaneetu? Tudi penyî?

⁹¹ Kabaakamanya dituku to. Kabaakamanya to. Ke bwa cinyi dyakabapita, mbwalu kabaakadijingulula to. Bavwa bu mu dituku, batambe kufwanangana ne bantu baa leelu ewu menemene, bafofomija kudi bijaadiki bya mamanya a pa buloba, kudi ndongolwelu ya maalu a tulaasa, kudi ma-seminere a dilongela dya maalu a Nzambi mu tulaasa. Nenku bintu byakabafofomija mu dituku adi abi, mbyenze cintu cimwecimwe aci leelu ewu. Ke cididibafofomije, cyakabidi.

⁹² Nenku, kabidi, didipwekesha, didipwekesha dya mukenji ne musanjeela! Noa kavwa mwena bya mamanya a pa buloba to. Kavwa muntu mulonge tulaasa to. Uvwa cidime mupele, wa bupwekele, mwikale ne mukenji mupwekele. Uvwa mutambe kupwekela be bwa butumbuke bwa malonga abo a mu tulaasa.

Ke mudibi kabidi leelu ewu! Nzambi udi ubivwija anu bipwekele, bwa kupeta bantu biikala mwa kuMwitabuuja ne kuMweyemena. M'Mukenji mushiilangane, mushiilangane menemene, kadi anu Nzambi umweumwe awu. Mpindyewu ndi muswe bwa nwênù kuWitabuuja ne kuumvwa ne Nzambi ngudi muWäkùle.

⁹³ Yesu wakamba ne baakaseka muprofeta Wende, Noa. Ne anu mwakasekabo mu dituku adi amu, ke mwenzabo kabidi ku Dilwa Dyende. Bavwa ne cya kwenza cintu cimwecimwe aci.

Ke cyakenza ne Pâlò afwe mu mâyi mu mbû. Kavwaku mujingŭlŭle dituku dyende to. Kaakajingululaku civwa munkaci mwa kwenzeka to. Uvwa mutambe kudibwinka mu bivwaye wenza bya cikondo cyende cya mamanya a pa buloba aci, bwa kwikala kwibaka bimenga ku midimu mikole iwabo benzeja bapika ayi. Uvwa mutambe—uvwa mutambe kwikala mudifile be, kayi mwa kujingulula mpunga uvwaye mupete, ke kwipataye muprofeta-musanjeela wa Nzambi awu ne kumutuma mu cipeela. Kaakacijingulula to. Ke cyakenza ne maalu aye mushindu wakayawu awu. Kaakacijingululaku to. Wikalapu nanshà mujingŭlŭle Dîyi dilaya dya Nzambi, mwenzela cisamba aci's we!

⁹⁴ Ne bu ekeleeziya leelu ewu mwa kujingululaku, bu ekeleeziya mwa kujingululaku Dîyi dya Nzambi didi dyenze mulayi bwa dîbà edi ewu, mulayi mwenzela bantu, kabavwa mwa kubutuka to.

Bu Amerike mwa kujingululaku mukanda wa mêyi makulu a ditunga wakenzabo, kavwa mwa kwikala mupete meeji a kuumusha Bibles mu bilongelu, kuumusha Dînà dya Nzambi pa mfranga ya bicyela, ne dicipa dya cyèlekà biimanyine pa Nzambi to. Kadi kèna ucijingulula to. Bwa cinyi? Udi mpofu, butaka. Kèna mwa kujingulula mashi a mushinga mukole a bânà baa balume abu baakafwila mu byalu bya mvita bwa dyèsè diine edi to. Bakaadi babapwe mwoyi, bakaadi lupwishi.

⁹⁵ Kadi kudi Kampana Udi uvuluka cya bushuwa mashi akaya panshi a baprofeta, mushinga wakayiilabi bwa kututwadila Evanjeeliyo ewu leelu ewu. Mwakadyabo binunu ne binunu kudi nyama ya ntambwe, babèlè mu meena a ntambwe, babakosolole bitupa bitupa pankaci ne scie wa kupanda nende mabaya awu, kubooshabo mu mudilu, kubapoopelabo pa nkuruse! Nzambi mmubijingŭlŭle.

Ekeleeziya mmupwe baprofeta baabo mwoyi. Kabacyena “kabidi naabo dijinga to,” bu mudibo bamba. Kadi Nzambi Yèyè mmumanye ne bidi bikengela Yèyè kwikala naabo; Yèyè udi upempa bantu Bende ku Dîyi Dyende. Kadi aci cikaadi citambe kwikala cya cyena kale bwabo bôbô mu dituku edi. Kabeena baCijingulula to. Ke bwa cinyi badi mu ngiikadilu udibo ewu. Ke bwa cinyi badi “butaka, beena dikenga, bampofu, bakengeledi,

kadi kabayi bacimanye to,” mbwalu kabeena bajingulula dîbà ditudi ne mwoyi to. Kabeena badimona to.

⁹⁶ Mòsà, yêyè wakajingulula dituku dyende ne dibiikila dyende, paakamonaye mulayi wa Dîyì dya Nzambi dya dituku adi mushindika. Ke kumanyaye musangu awu, ne kufikaye ku dyumvwa civwaye ne civwaye ne cya kwenza, ku Dîyì dilaya. Pa nanku yêyè kaakaciina bivwa nî nganyi nî nganyi wamba to. Kavwa ne bundu bwa mukenji wende to, nansha mwakwidi yònsò anyi pâlò yònsò, anyi cinyi cyònsò, mukookeshi yònsò, mwikale kayi utwa ku cyende. Kadi yêyè wakajingulula paakamonaye Bukênkè abu, Dikunji dya Kapya adi divwa dilembelele mu kiitwitu aku, ne dyakamwambilà Dîyì divwa dilaya bwa dituku adi adi, dyamba ne: “Ndi mukubiikile bwa uye kenza cyòci aci.” Yêyè kaakaciina di—dimukanyina dinene dya mfumu to. Wakapweka bwa kwangata bantu abu ne kuya naabo mu cimwangi, bu muvwa Dîyì dya Nzambi dilaye.

⁹⁷ Paakamonaye mulayi awu mushindika, wakafikisha cisamba aci ku didilongolola ku cimwangi cyabo. Dîbà kaayi? Paakamonaye mulayi wa Nzambi mushindika. Nwavulukaayi ne, yêyè wakanyeema ne mamanya ende a—Nzambi a mu tulaasa awu; wakanyeema ne didiibidija dyende adi. Kadi paakamonaye Dîyì dya Nzambi dimweneshiibwe, yêyè kuDimona dishindika ne: “NDI EWU ÛNDÌ,” dîbà adi kaakacyuka civwa nî nganyi nî nganyi wamba to. Kaakaciina civwa Pâlò mwa kwenza nende to. Kaakaciina civwa bakwabo abu mwa kwenza to. Yêyè wakaciina anu Nzambi, bwa kafiki ku dyumvwa Nzambi bibi, anyi mushindu kampanda wa kufikaye ku dyumvwa Nzambi bibi to. Kaakaciina bantu anyi civwabo mwa kwamba anyi civwabo mwa kwenza to. Wakaciina yêyè anu Nzambi, paakamanaye kujingulula ne civwa n’Dîyì dya Nzambi.

⁹⁸ Kavwa mwa kuumvwa mushindu kaayi uvwa muntu bu yêyè awu mwa kutumiibwa muntwamu nansha. Kadi paakajingululaye, ku Dîyì dishindika ne, civwa ncinyi, pa dîbà adi kaakaciina mêtî matuma a mfumu to. Bu wêwè nansha mwa kujingulula, bu twètù leelu ewu mwa kujingulula’s we! Mòsà wakajingulula cyòci aci paakamonaye Dîyì dishindika, paakamonaye dishindika divwijiibwe cijaadiki, ke yêyè kadilongolola ku cimwangi bwa cisamba.

Yobo kavwaku mujingulùle ne civwa n’Nzambi to. Pacidi anu dyabulu mwa—mwa kukufikisha ku diitabuuja misangu mikwabo ne tuumateeta tukese tûdi upicila atu n—n’Nzambi udi mwa . . . udi ukunyooka! Civwa n’Nzambi mwikale uteeta kumuleeja cintu kampanda. Yobo yêyè kaakacinjingulula to anu paakamonaye cikeena-kumona. Anu bu Mòsà; Mòsà paakamonaye cikeena-kumona, Dikunji dya Kapya mu kiitwitu amu, bwalu bwakashindikiibwa. Nenukua . . .

Yobo, mu didikonka dyende: “Muntu yêyè mufwe, udi mwa kwikala cyakabidi ne mwoyi anyi? Ndi mmona mucu ufwa, kadi wikala cyakabidi ne mwoyi. Ndi mmona cilòngò cifwa, kadi ciikala cyakabidi ne mwoyi.” Ke lukondo luvwaye udyela alu. “Kadi muntu yêyè udi ulaala panshi, ukuula mwoyi, ushaala mukwate ne bya luse. Bânà bende baa balume balwa bwa kwenza madilu, kadi yêyè kayi ubimanya to. Kaa, bu Wèwè mwa kunsokokaku mu lukita too ne paapita ciiji Cyebe!” Kavwa mwa kuumvwa bwa cinyi cilòngò civwa mwa kufwa kadi kwikala cyakabidi ne mwoyi, muvwa dibeji mwa kupoopoka ku mucu, kumata panshi, ne kushaala panshi apu, ne kwalukila cyakabidi mu muvù utu bintu bitoloka to. Ke yêyè ne: “Muntu udi ulaala panshi, kadi kuyaayaye mpenyi? Mèmè ndi mwitabuuje Nzambi; kadi cidi cyenzekela muntu ncinyi?”

⁹⁹ Kadi pashiishe dituku dikwabo ke mukenyi kubanga kwela, mikungulu kubanga kukungula, Nyuma kwikila muprofeta. Ke kumonaye dilwa dya Muntu Uvwa mwa kuteeka cyanza Cyende pa muntu mwenji wa mpekaatu, ne pa Nzambi wa cijila, nenku kwela cilamba pankaci apu. Ke kwelaye lubila ne: “Ndi mumanye ne Mupikudi wanyi udi ne mwoyi! Nansha misanda ya dikoba minyangakaje mubidi ewu, kadi mu musunya wanyi mèmè nèmmonè Nzambi!” Wakajingulula civwa dibiika dya ku lufu.

¹⁰⁰ Baalama kaakajingulula Mwanjelo to too ne paakalwa kampundu kwakula mu myakulu. Baalama kavwa mwa kujingulula ne Mwanjelo uvwa mumucyamakane mu njila to. Muiishi mufomija kavwaku mwa kujingulula ne civwa n’Nzambi mumucyamakane mu njila to, mwikale ukeba bwa kumupangisha bwa kusumbisha dipà dyende ku mfranga. Nenku paakaakula kampundu aku ne dîyi dya muntu, ke Baalama kushiisha kujingulula ne uvwa m’Mwanjelo mumucyamakane mu njila, mwikale ukeba bwa kumupangisha bwa kwenza civwaye wenza aci.

¹⁰¹ Kaa, mangumba mafomija! Piikala Nzambi mwa kukwata mudimu ne kampundu, kàvwà kamama aku, bwa kwakulaku mu mwakulu udiku kakayi kamanye, bwa kubuulwila muiishi kampanda ne mmusesuke mu njila, Yêyè kèna mwa kukwata mudimu ne muntu bwa kwenza cintu cimwecimwe aci anyi? Bantu bafomija naanyi we!

¹⁰² Bu nanshà Aakaba mujingulule dituku dyende, nunku kî mmupisheku muprofeta to, Miika, wâkamutwàdila Dîyi dya Nzambi dya mulayi adi.

¹⁰³ Paakiimana Aakaba mwaba mwine awu dituku adi, yêyè ne—ne Yehoshafata. Nenku pavwabo ne baprofeta nkama inaayi kuntwaku bamba biprofeta, bamba ne: “Nda! Byònsò mbîmpè. Aakaba, udi musòmbe mu mpekaatu. Udi mutuvwije dingumba dinene! Tudi cisamba cinene. Tudi mudimu wa bwambi munene.

Ke twètù aba, tudi baakwidi nkama inaayi balongeshiibwe, anyi baprofeta. Tudi nkama inaayi, balongesha mu Dìyi ne mu mamanya a maalu a Nzambi mu tulaasa. Twètù mbadi bamanye byònsò bidi bitangila Cyôci aci.”

¹⁰⁴ Pa nanku, mpindyewu, kujaadikiibwabi ne kabavwa bamanye byònsò pa bivwa bitangila Cyôci aci to. Muntu mwine wákabiikilàbo ne mmupâle, wa mu lukongo luvwa lubadyanjidile alu awu, Eliya, muprofeta mulelela wa Nzambi, ukaavwa mudyanjile kwamba ciprofeta ne: “EMU MMUDI MUKALENGE WAMBA: ‘Mbwa neyilake mashi ebe, wêwè Aakaba!’” Nwamonu anyi?

¹⁰⁵ Kadi baakwidi abu, baprofeta bakwàtakaja kudi bantu abu, bavwa beela meeji ne bavwa ne Cyôci aci cimana kwimanyika bîmpè. Bavwa bamba ne: “Taatu Abraham...anyi ne, Taatu Aakaba, nda! Mukalenge udi neebe. Wêwè ngudi ne Mufundu, bwalu Nzambi ngudi mupe Izaleela buloba ebu. Mbwa Izaleela. Nda! Mukalenge udi neebe.” Ekelekele!

¹⁰⁶ Kadi nudi bamanye, Yehoshafata, muntu uvwa kayi mudivwande mu mpekaatu bu Aakaba to, yêyè uvwa umona maalu mushindu mushiilangane ndambu. Kwambaye ne: “Kakwenaku mukwabo anyi?”

¹⁰⁷ Ke awu ne: “Tudi nende kaaba aka, kadi mêmè ntu mumukine.” Nuumvu anyi? Civwa Nzambi munkaci mwa kwenza ncinyi? Ukosolola cisamba Cyende, ne muprofeta, cyakabidi. “Mêmè ntu mumukine. Kêna yêyè ne cidiyè wenza to anu kumpiisha dîbà dyònsò. Kadi peebe’s udi mumanye ne mêmè ewu ndi muntu munene. Ncivwa mwa kwikala mwenze seminere ewu kaaba aka bu nciyi mwena kwitabuuja munene to. Ndi ne bantu balongesha bîmpè. Ntu mubajaadike muntwamu ne mikanda ne ma-Bibles, ne bikwabo byònsò, bwa kwikalabo balongesha bwalu ebu. Ne ntu mumanye ne bôbò mbantu banene.”

Kadi bu nanshà Aakaba mujingùlùle ne mwine mulumyana awu uvwa nganyi, kalumyana kavwa kamweka ku mèsù bu kavwale mbondya ne kakwate ne bya luse aku, mwànà wa Imla, mwimane mwaba awu, umwambila ne: “EMU MMUDI MUKALENGE WAMBA,” kavwa mwa kwikala mwenze cilema cya njiwu cyakenzaye aci to. Kadi yêyè wakapiisha Miiika. Kavwaku...

Kaa, nwênù bantu, jingùlùlaayi cikondo cinudi ne mwoyi eci’s! Tangilaayi numone cidi cyenzeke. Tangilaayi numone cyakalayiibwa. Jingùlùlaayi cikondo cinudi ne mwoyi.

¹⁰⁸ Bu nanshà dingumba dya ekeleeziya leelu ewu mwa kujingulula bwa cinyi badi munkaci mwa dipiishiibwa, ne mbwa cinyi bidimba byabo bidi munkaci mwa kubanyeema, byenze bu Izaleela unyeema Ejipitu! Bu nanshà mangumba mwa kulekelaku dipiisha mikaba ya mēyi ayi, ne bu bôbò

mwa kuyiteelejaku! Ne wêwè, muyiishi, udi uteeleja mukaba wa mêyi ewu, teeleja! Bu wêwè nanshà mwa kujingulula dîbà dyûdî ne mwoyi, bu wêwè nanshà mwa kujingulula cimanyinu cya cikondo, nunku udi muumvwe bwa cinyi bantu badi munkaci mwa kunyeema mangumba awu. Nyuma wa Mukalenge, mwikale ubiikila! “Muntu nansha umwe kèna mwa kulwa kûndi Mémè,” mwambile Yesu, “padi Taatu Wanyi kayi mumukoke. Ne ewu yônsò ukaadi, mu bikondo bikaadi bipite, ukaadi Taatu muMpe, nealwe.”

¹⁰⁹ Bu kakaji kaa ku ciina cya mâyi aku, ne mwakwidi, mushindu mwine uwabo bashiilangane’s we! Mufundu ngwewu ku cimanu cya leelu eci, cyakabidi. Mbawumone, kadi kabayi bawujingulula to.

¹¹⁰ Bu nanshà beena Yuda biikale bajingulùle cimanyinu cya Maasiya, bilondeshile muprofeta wabo wa ndekeelu! Maalaki 3 wakamba ne: “Monaayi, Ndi ntuma musanjeela Wanyi kumpala Kwanyi, nenku yêyè nealongolole njila.” Baa bwalu bavwa balaka mukana bamba muvwabo baMwindile.

¹¹¹ Aci’s cidi—cidi cintu cifwanangane too ne—too ne leelu ewu! Bavwa bamba muvwabo bindile cintu kampanda civwa mwa kwenzeka. Ekeleeziya nyeyi yônsò isambila ne ijila byakudya, bamba ne: “Mpindyewu tusambilaayi. Tudisangaayi. Netwikale ne cya kupeta cintu cinene kampanda ciikala ne cya kwenzeka. Tudi bamanye ne kudi cintu cinene kampanda ciikala mwa kwenzeka. Bikengela ekeleeziya ikale mudilongolole.” Ke cyôci aci cidibo badifidile mu masambila.

¹¹² Ke civwabo badifidile mu masambila kwaka. Ke kulwaku Yone Mubatiji. Bwalu, yêyè kubenga ma-seminere abo, bwalu uvwa wenza maalu mashiilangane ne cyakalongeshabo kudi baataatu baabo. Yêyè wakapatukila mu cipeela kayi mulonge kalaasa to. Wakapatuka kayi ne nshingu wa nkoolo to, mudibo bafwanyine kwamba leelu ewu. Wakapatuka kayi ne mamanya àbûngî menemene a Nzambi a mu tulaasa to. Kadi yêyè wawalwa, mumanye ku mulayi wa Nzambi ne yêyè nguvwa ne cya kumanyisha bwa Maasiya.

Wakamba ne: “Yêyè awu mmwimane munkaci mwenu patudi twakulangana apa.” Kadi bôbò bavwa beela meeji ne mmupâlè, bwalu kaakapatukila mu tulaasa twabo to. Mufundu ukaavwa ku cimanu, kadi bôbò kabayi bamanye to. Bavwa bamba muvwabo bindile Muntu wa mushindu awu bwa kulwaye; kadi Pende mwikale munkaci mwabo. Kadi kabaakaMujingululaku to, nansha muvwabo mene bamba ne mbaMwindile amu.

¹¹³ Bifwanangane anu menemene, ne bya beena Yuda, mudibo basanganyiibwa, anu mudi baa Bisamba bya bende ne wabo paabo, bwalu ciprofeta anu cimwecimwe aci ncyakambiibwa, cintu cimwecimwe aci. Bavwa bamba muvwabo baMwindile. Kadi mangumba mpindyewu mu cikondo cya baa Bisamba bya

bende cya Laodikiya eci, mbampofu menemene anu muvwabo amu, bwalu (bwa cinyi?) ciprofeta cikaavwa cyambe ne ke mwikalabo. Cidi ne cya kukumbana.

¹¹⁴ Bu nanshà Izaleela mwa kwikala mujingùlùle cimanyinu cyabo, nunku's mbamanye ne cikondo cya dimweneka dya Maasiya civwa pawwipi. Biikalapu nanshà bajingùlùle's we!

Nudi bamanye, bayiidi baakacyambila Yesu. “Mbwa cinyi bafundi badi bamba, ne: ‘Eliya udi ne cya kulwa dyambedi?’”

¹¹⁵ Ke Yesu kwamba ne: “Eliya ukaadi mumane kulwa, kadi kabaakamumanya to. Ukaavwa mwaba ewu, ne bôbò bakaadi bamane kumushipa. Mbenze anu menemene muvwa Mifundu myambe ne nebènzè.”

¹¹⁶ Biikalapu nanshà bajingùlùle, bwa ne “mukoleshi wa maalu” wa bwena wâkapiisha bintu byônsò bibidi byakenzabo abi awu, wa bwena uvwa upiisha kantu ne kantu kavwabo benza awu. . . Yêyè wakamba ne: “Nwenu beena lubombo! Kanubangi ku- . . . Nyoka ya mu bisoosa, nwênù lukongo lwa nyoka ya ntooka, wanudimwiji bwa nwênù kunyeema cijji cilwalwa nganyi? Kanubangi kudyambidila munda mwenu amu ne: ‘Tudi ne Abraham bu taatu wetu. Tudi ne *cikampanda*, *cikansanga*, anyi *cikankenga*.’ Bwalu nyawu nzwambila, Nzambi udi ne bukole bwa ku mabwe aa kujúudila Abraham bânà.”

¹¹⁷ Kanubangi kudyambidila ne nudi ne Nsangilu wa Buloba bujima mu cyanza, ne nudi ne bidimba bidi bivwala mvwadilu wa mutambe bwimpè biikalemu nansha. Nzambi udi ne bukole bwa ku mpuku ya mu misèèsù eyi kujúula bânà bwa kuuja Dîyì Dyende; bandumba, bendakanyi baa mu misèèsù, bakwaciki baa maluvu, banayi baa twarta twa mfranga. Yêyè udi ne bukole bwa kucyenza. Ucidi anu Nzambi.

¹¹⁸ Mangumba mafofomija, bu muvwa Izaleela mufofomija, bubidi bwabo ciprofeta cikaavwa cyambe ne nebiikale nanku awu. Ndi munkaci mwa kunuleeja bintu bifwanangane, too ne pângààfikà ku kaaba kândi muswe kufika mpindyewu aka. Bafofomija, bu mudi—mudi mangumba a baa Bisamba bya bende baa cikondo cya Laodikiya aba, mbafofomija leelu ewu anu muvwabo cikondo aci.

¹¹⁹ Cikondo cya Laodikiya ncidi ne cya kwakidila Mukenji! Maalaki 4 mmwambe ne mbôbò.

Kadi cidibo bakeba ncinyi? “Dingumba dyetu ke dyapatula Cyôci aci. Piikalaci kaciyi civwila kutudi twêtù, ba-Baptistes, ba-Presbytériens, beena Assemblées, ba-Unitaires, kudi. . . byôbì ne kî ntwêtù badi baCipatule to, Cyôci aci kî ncilelela to.”

Cintu cimwecimwe cyènzèlèbo mu dituku adi! Nenku cyôci kulwa e kuya, kadi kabaakamumanya to. Kabaakacijingulula to, nansha mwakuujaci Dîyì dyônsò amu. Yesu wakamba ne: “Mbenze anu mukaavwabi bimana kulungolola ne nebènzè.

Ke mwenzelabo kabidi Mwânà wa muntu,” Yêyè uvwa mwa kubengiibwa.

¹²⁰ Tangilaayi mpindyewu, cintu cimwecimwe aci mu matuku a baa Bisamba bya bende, bilondeshile Mifundu milaya ya Maalaki 4.

Bwalu, Yesu wakamba ne: “Mufundu wònsò mmusonsola, ne katupa kaawu nansha kamwe kakaakupanga kuula to.” Kakwena mushindu wa kupangisha Mufundu bwa kuulawu to. Yònsò idi ne cya kuula. Ne Yesu wakamba ne nebyenzeke. Ke twètù badi bamona byenzeke aba. Tudi tubimona.

¹²¹ “Kwalujulula” cinyi, mu matuku a ndekeelu aa? Nwènù bânà beetu baa cyena mangumba, teelejaayi! Kwalujulula difesto dya mpenta, dya ku cibangidilu. Mushindu uvwaCi ku cibangidilu, ke mwikalaCi mwa kwalujuludiibwa kumpala kwa difesto dya Mpungi dya beena Izaleela kweladi. Bikengela Cyalujuludiibwe! Bikengela kwikale cintu kampanda bwa kwenza cyòcì aci. Maalaki 4 mmwambe ne uvwa ne cya kwalujulula Diitabuuja dya baataatu, kudi bânà, ke civwa mwa kwenzeka.

¹²² Bu nanshà Izaleela mwa kwikala mujingùlùle Maasiya wabo, cimanyinu cilaya, nunku kabavwa mwa kwikala mwaba ukaadibu leelu ewu to. Bu nanshà bôbò ba- . . . Kadi bwa cinyi kabaakacyenza? S’mbyenza ne luse be. Kabaakacyenza bwa cinyi? Bwalu Nzambi ukaavwa mwambe ne kabaakacyenza nansha. Mbanganyi badi biitabuuja nanku, bâmbè ne: “Amen.” [Disangisha didi dyamba ne: “Amen!”—Muf.] Nzambi ukaavwa mwambe ne kabaakacyenza nansha.

Ne Nzambi umweumwe awu ngudi mwambe, mu Cikondo cya Ekeleeziya wa Laodikiya ne, cyòcì eci necyenzeke, nenku ke cyòcì eci kumpala kwabo. Mmunyi mudibo mwa kwenza cintu kampanda kabayi benza cyòcì eci?

¹²³ Biikalapu nanshà bajingùlùle cimanyinu cilaya cya Maasiya, cimanyinu cya Mwânà wa muntu’s we! Yêyè wawalwa mu dînà dya Mwânà wa muntu. Mpindyewu, Yêyè uvwa mu dînà, mu Cikondo cyònsò cya cyena Mpenta, mu Nyuma Mwîmpè, Mwânà wa Nzambi. Mpindyewu, cintu cidi cilonda m’Bukalenge bwa bidimu cinunu, Mwânà wa Davidi. “Bânà” basatu, Nzambi umweumwe awu. Umweumwe awu, “Taatu, Mwânà, Nyuma Mwîmpè,” Nzambi umweumwe awu. Mwânà wa Davidi, Mwânà wa Nzambi. . . Mwânà wa Davidi, Mwânà wa muntu, Mwânà wa Nzambi, n’Nzambi umweumwe awu misangu yònsò, kadi mwikale anu mu midimu ya myânzù isatu mishiilangane.

¹²⁴ Ke mudibi ne “Taatu, Mwânà, Nyuma Mwîmpè” kî n’Nzambi isatu to, kadi Nzambi anu umweumwe awu mu bipungu bisatu, midimu ya myânzù isatu, bu Taatu, Mwânà, ne Nyuma Mwêmpè.

Kadi, bu mudi leelu ewu, bafofomija kudi bilele anu muvwabo musangu awu, bafofomija kudi bilele, kabayi bacimona to. Mbwa cinyi mudibo kabayi mwa kucimona?

Kabaakucimonaku to. Nwavulukaayi ne, aci cidi EMU MMUDI MUKALENGE WAMBA.

Udi wamba ne: “Kadi udi ucyamba bwa cinyi?”

Anu mushindu umweumwe wakamba Yone awu, mushindu umweumwe wakamba bakwabo abu. Kudi umwe mukâlâme apa ne mukwabo mukâlâme paapa, badi bakengela kubapatula. Kaa, nwênù mikooko ya Nzambi, umvwayi Dîyì dya Nzambi! “Mikooko Yanyi idi yumvwa Dîyì Dyanyi.”

¹²⁵ Mukaji wa ku ciina cya mâyì wakajingulula dituku dyende, ku cimanyinu cya Maasiya. Uvwa mu mmwenekelu mubi. Kavwa muswe kukutakanangana ne ekeleeziya ya kale ayi nansha, mushindu uvwayi yenza awu. Ivwa isòmba nsòmbelu wa mushindu wònsò naka, kabidi, bintu bivwayi yenza, yêyè kavwa witabuuja bintakanyi abi to. Kadi uvwa mumanye ne nekulwe Kampanda dîngà dituku. Kakajaana aku kakwate ne bya luse kuntwakwu, mu njila kenda kaya ku ciinà cya mâyi; kusanganaku Cintu civwaku kakebakeba aci, paakabangaYe kusokolola bwalu busokome bwa mu mwoyi wende, kumwambila ne mmu mpekaatu kaayi muvwaye musòmbèle.

Kwambaye ne: “Mukalenge, ndi mmona ne Wêwè ewu udi Muprofeta.” Mpindyewu, kabavwa bapete muprofeta to kukaavwa bidimu nkama inaayi. Yêyè ne: “Ndi mmona ne Wêwè ewu udi Muprofeta. Kadi mêmè ndi mumanye ne paalwa Maasiya Yêyè ke wênza bintu ebi.”

Yêyè ne: “Mêmè ke Yêyè awu.”

¹²⁶ Yêyè kujingulula. Kakucivwa kabidi bya dikonka ne: “Udi mwa kujaadika ciine aci bishi?” Cikaavwa cijaadikiibwe. “Paalwa Maasiya, ke cyenzaYe eci.”

Ee, piikalaye mwa kucijingulula ku Mifundu, twêtù katwena mwa kujingulula Makênkè a diloolo ne cimanyinu cya leelu ewu anyi?

“Twêtù tudi bamanye ne paalwa Maasiya Yêyè neatuleeje bintu byònsò ebi. Ke cyatwambilaYe eci.”

Yêyè ne: “Mêmè udi wakulangana neebe ewu ke Yêyè awu.”

¹²⁷ Kakuciyi kabidi cya dikonka to. Kuumuka kuyaye, wenda wambila bantu ne: “Lwâyi, kanumonaayee! Ke Yêyè ewu.” Kakucivwa kabidi bya dikonka bwende yêyè to. Bwalu kutuuka, bwalu wakajingulula dituku divwaye ne mwoyi. Yêyè wakadijingulula.

¹²⁸ Ke mwakenza pende Natanaela, mwena Ebelu munene, paakamonaye cimanyinu aci cya Maasiya cyakalayabo mwaba awu; nansha muvuwaku bakwidi bààbûngi mwaba awu, nansha bintu bikwabo byàbûngi abi.

Cyakenza cinyi? Cyakatacisha baikwidi, pa kumona bantu abu buumuka mu ekeleeziya baya. Yêyè ne: “Muntu

nansha umwe wa kunudi yêyè anu mudidinge muye mu disangisha Dyende, udi wipaciibwa. Netukwipate dyakamwe mu dingumba.”

129 Ke mudibi kabidi leelu ewu. “Netukwipate mu bulongolodi bwetu wêwè muye mu disangisha dyende.”

130 Nudi nuvuluka muntu mulume mpofo awu anyi? Tatwëndè ne mamwëndè kupangabo too ne mwa kwandamuna; bavwa ne bwôwà. Bwalu, bavwa bamba ne: “Muntu yônsò uvwa uya bwa kumona Yesu awu, anyi—anyi uvwa uya mu masangisha Ende awu, bavwa mwa kumwipata.” Kadi, mpofo awu wakapeta mwa kudyakwila, yêyè uvwa mpofo kadi ukààvwa pa dîbà adi umona awu.

131 Mêmè ewu, uvwa mpofo kale wawa, ndi mpindyewu mwa kumona. Mêmè ewu, uvwa nciyi mumanye bintu ebi, bikaadi bimmanyisha kudi Nyuma Mwîmpè. Kutululaayi mwonji wenu awu, nwênù mangumba, bwalu bôbò balwalwa, nansha bya munyi! “Mêmè mubandishiibwe kuulu kwa buloba, Nênkokè bantu bônsò kûNdi.”

132 Natanaela wakacijingulula. Wakacimanya.

133 Anu mwakadi bijaadiki bya Môsà bya mu Mifundu, Dîyi dishindikiibwe. Môsà wakamanya ne ke civwa mulayi wa dituku adi, bwalu civwa cya mu Mifundu, nansha muvwaci cya pabwaci bishi. Wakamba ne: “Ndi mwa kubambila ne Nganyi. . . Nêmbâmbilè ne ndi mumone Bukênkè lwa kuneeku kwa cipeela eku. Mmuniya mûndi mwa kubambila mpindyewu ne kuvwa Bukênkè lwa kuneeku eku, ne Bukênkè bwine ebu bwangambidi bwa kupweka muntwamu?”

Yêyè ne: “Ncya bushuwa, Môsà, Mêmè nêngikalè neebe.” Ne kaciyi anu. . .

134 Kaakadileeja Yêyè mwine mu Ejipitu to; anu bishima ne bimanyinu nkaayaabi. Kadi paakabasangaYe bônsò, ke Yêyè kubamwenekela cyakabidi, ne kushindika mudimu wa bwambi wa Môsà kumpala kwa Basungula ne babiikila bwa kupatuka. Muprofeta awu paakamanaye kubakosolola ne ditunga adi ne kubabweja mu mwaba kampanda, ke paalu Dikunji dya Kapyà kumweneka cyakabidi, piine apu pa mutu wa Mukuna wa Sinai.

135 Fwanyikijaayi cyôcì aci ne leelu ewu. Hmm. Amen! Butumbi bwikale kudi Nzambi! Eci ncipite mwoyi bwanyi mêmè. Bidimu byanyi mbibange kubânda, ne ndi mmona dîbà dya maalu a ciipanshi ne masandi bitangalaka mu ditunga ne bintu bikwabo, ke pândi ntuma mèsù paanyima mmona cidi cyenzeke. Mwoyi wanyi udi utupika ne disanka, mwikale mumanye ne paanyima pa cikondo tabernacle wa cisòmbedi cya buloba ewu neikale muupudiibwe, kadi ndi ne mukwabo mungidile dyamwamwa. Ndi nteeta bwa kukoka cisamba kampanda, mbakosolola ne ebi bintu ne ebi bintu, bwa kubakoka ne kubapatula; bwa kubaleeja, ku Mifundu, ne Nzambi ngudi mwimane mwaba awu;

ne dishindika dya Dikunji dya Kapya, dikaadibo bamonemone kudi nkama ne binunu bya bantu, ne mene Dyôdì adi, kumpala, badikwate fòtò ku cyamu, misangu ne misangu, bwa kujaadika bwalu abu.

¹³⁶ Batentudi badi bajuuka. Ncya bushuwa, bikengela aci cyenzeke. Batentudi baakajuuka mu dituku dya Mòsà ne baakenza cintu cimwecimwe aci. Nzambi kwamba ne: “Ditapulule, Mòsà. Kulamakanyi naabo to. Mèmè nêmbàminè.” Ke buloba kubaminabu. Nenu ke mudi kabidi bwalu leelu ewu; kwalukila buludi mu maalu a pa buloba, maye a dipeta naawu mfranga ne bikwabo byònsò. Nwamonu anyi?

¹³⁷ Cimanyni cya mu Mifundu cya Mòsà! Yêyè ke uvwa—yêyè ke uvwa muprofeta munene wa Nzambi wâkapweka muntwamu bwa kubasungila, ne bôbò baakacijingulula. Bôbò baakacijingulula cimanyni. Yêyè ke uvwa mulayi mwine menemene wa mu Mifundu, mushindikiibwe.

¹³⁸ Yesu uvwa mulayi awu wa mu Mufundu, mushindika bwa mukaji awu. Anyi, Yêyè ke uvwa Dyumvwija. Yesu ke uvwa Dyumvwija dya Mufundu. Anu nsòmbelu Wende mwine uvwa uumvwija Mufundu.

¹³⁹ Kanwena numona Mukenji wa cikondo anyi? Nudi mwa kujingulula mwaba utukaadi anyi? Anu Mukenji Wôwò mwine, kuumukila ku Mufundu, udi unupa dyumvwija dya dîbà ditudi ne mwoyi. Wôwò ngudi dyumvwija mene.

¹⁴⁰ Yesu wakambila Izaleela ne: “Nwîkalapù bamanye dituku dyenu.” Musangu mukwabo, musòmbè pa Mukuna wa Oliva, Yêyè kutangidila lwa kuulu aku, kwamba ne: “Yelusalema, Wêwè Yelusalema!” KwasaYe mwadi. KutangilaYe kwinshi aku. KumonaYe.

Kabiya mu lusumwinu to, pàmwäpa, mu mushindu kampana. Diloolo dikwabo, dinda kampana, lwa pa dîbà dya dikumi, pângààkamònà ekeleeziya-ndumba awu. Munda mwa mwoyi webe menemene amu, udi uumvwa Nyuma Mwîmpè mudiye umacisha bisonji.

“Yelusalema, Wêwè Yelusalema, mmisangu bûngì kaayi ìnkaadi muswe kukukungwija. Kadi cyûdì mwenze ncinyi? Wêwè kushipa baprofeta bândi mukutumine. Ubashipa ne cikisu.”

Ne Mikenji miine ikaadiku mitumina ekeleeziya, leelu ewu, mmishipa ne cikisu kudi mēyì abo maswika a cyena mangumba. Mufundu mmushipa ne cikisu kudi mēyì abo maswika. Yesu kwambaye ne: “Bu wêwè nanshà mumanye dituku dyebe! Kadi, dikaadi kule kwa menemene mpindyewu, dîbà dikaadi dipite menemene mpindyewu.” Ke mudibi kabidi bwa maeeleeziya!

¹⁴¹ Ndi ngitabuuja bushuwa, ne mwoyi wanyi wònsò ne, yêyè ukaadi musambuke ne pa dipikudiibwa diine. Nansha wêwè muswe kukwelela meeji bishi, awu udi anu webe

mmwenenu. *Ewu* ngwanyi mêmè. Nwamonu anyi? Kwèna mwenzejiibwe bwa wangate wanyi mmwenenu to. Kadi mêmè ndi ngitabuujà ne yêyè ukaadi musambuke too ne dipikudiibwa diine, ne mmusambuke, mupite kukaadi bidimu bitaanu anyi bisambombo. Ndi muvuluke. Nudi bavuluke Chicago. Tangilaayi numone cikaadi cyenzeke kubangila piine apu, ne tangilaayi numone mudici citungunuke ne kwenzeka. Nwamonu anyi? Vulukaayi ne, dîna dyanyi didi pampala apu. Ndilamika apu. Cidi EMU MMUDI MUKALENGE WAMBA. Tangilaayi numone yêyè ni kî mmudishinde, mutunguke to.

¹⁴² Tangilaayi cidimu cya 1933, mwakambaci mushindu uvwa bakaji mwa kwenza maalù mu matuku a ndekeelu aa. Mudici cyambe ne mudi bantu. . . Mushindu uvwa Mussolini, muvwaye mwa kufika ku ndekeelu wende. Mushindu uvwa Hitler mwa kufika ku ndekeelu wende wa kayi uumvwiika to. Mushindu uvwa tusumbu tusatu atu mwa kuya kajikila mu communisme. Mushindu uvwa mashinyi mwa kulwa, mafwanangane ne diyi. Ne mushindu uvwa bakaji mwa kuvwala bilàmbà balwa bafwanangane ne bantu balume, biya kafwanangana mene too ne bilàmbà byabo bya mwinshì; ne kumana kumana bakafika too ne ku divwala dya mabeji a mfigi, bifwanangane, pambidi paabo. Mushindu wikala cyenzi cya masandi, mwikalabo mwa kwenza maalù awu mu dituku edi. Tangilaayi numone mukaadibo benze. Nenku's mbyôbì abi kumpala kwenu, patudi twakulangana apa.

¹⁴³ Bu nanshà bakaji beena Kilisto mwa. . . bakaji badi badibiikila ne mbeena Kilisto abu bu bôbò nanshà mwa kujingulula, kujingulula ne nyuma wa masandi udi pambidi paabo awu ngwa dyabulu, bwa kubafikisha ku dikosa dya nsuki yabo. Anu dyabulu ke cintu cimwepele cidi cifwanyine kwenza nanku. Aci cidi cibengangana ne Dîyì dya Nzambi bwenu nwênù, anu mwakadibi mu budimi bwa Edena. Baakenza cinyi? Bu bôbò nanshà bajingulule! Badi bateeta kwamba ne: "Kaa, ka-muyiishi kansantu kabunguluki ka mu malaba kaka, kajuuka kamba paaku!" Kî mmêmè to. Mêmè kî ngudi unwambila cya dyanza to. Mêmè ndi anu nnuteelela Dîyì. Bu bôbò nanshà mwa kujingulula ne ndyabulu.

¹⁴⁴ Badi badibiikila bôbò nkaayaabo ne mbeena Kilisto. Yesu wakamba ne: "Mmunyi munudi mwa kuMbiikila ne: 'Mukalenge,' panudi kanuyi nwenza bintu bìndì Mêmè ngamba bwa kwenza?" Kabeena mwa kwikala beena Kilisto nansha. Mêmè ncyèna mulumbulwishi wabo to, kadi ndi ngamba anu cidi Dîyì dyambe. "Mmunyi munudi mwa kuMbiikila ne: 'Mukalenge,' panudi kanuyi nwenza bintu bìndì Mêmè mwambe bwa kwenza?" Ne Dîyì mu kaabujima mwaba ewu's ndibuulula dya Yesu Kilisto. "Mmunyi munudi nuMbiikila ne: 'Mukalenge?'"

145 Bu bôbò nanshà mwa kujingulula ne ndyabulu, nyuma wa masandi. Tukaji tukwabo twimpè maalul pambelu paapa. . .

146 Ndi ngela meeji ne muneemu emu ke mwaba udi mutambe kwikala wa ciipanshi ûnkaadiku paanyi mumanye kacya bandela, Jeffersonville, Indiana, bwa bakaji biikale butaka. Nkaadi mufike mu Hollywood. Nkaadi mufike myaba yônsò. Nkaadi muye pa buloba bujima, ne nkaadi mumone mishindu yônsò ya bukooya. Nkaadi mubumone mu Paris. Nkaadi mubumone mu Angleterre, mwine udi mfumu wa makooya ônsò awu.

147 Ndi ngela meeji ne Angleterre neàtukinè dîngà dituku too ne mwinshi mwa mbû munene. Yèyè mmucikumbanyine; bukooya, manyaanu, bushaadile! Yèyè kadi's ke ciinà cya bucyafu cya masandi bwa buloba bujima, bantu badi batamba kubengangana ne Mifundu, ne bayivila bânkaadiku paanyi mumone kacya bandela. Yèyè ngukaadi mushaale cyôci aci bwalu mmubenge Bulelela.

148 Billy Graham uvwa wamba ne byakamukengela kupatula mukajende mu ma-parcs awu; masandi miikale enzeka munkaci mwa balume ne bakaji, nsongalume ne nsongakaji, anu pambelu nunku ewu mu parc amu, bantu bitangile. Yèyè's ukaadi mushaale ciinà cya bucyafu; nansha France kabidi, nansha bakwabo pa buloba. Nansha États-Unis kabidi, wenda ushaala ntungaamulongo wabo bônsò!

149 Tangilaayi leelu ewu. Babafikisha ku dikosa dya nsuki yabo, ku divwala dya tuputulu, mipanu, dinwa dya mfwanka, kadi biikale badibiikila ne mbeena kwitabuujja. Kwêna ufikaku ku dyumvwa, wêwê mwaneetu wa bakaji, anyi wêwê mukaji. . . Bya ciipanshi be, numfwile luse, kî mmwaneetu wa bakaji to; wenza cintu bu nanku awu. Kwêna ufikaku ku dyumvwa ne ndyabulu anyi? Kadi cidi. . .

Bu beena Yuda baa kalekale abu, kanwakwitabuujja Diyî dishindika to piikalaDi dijaadikiibwe kumpala kwenu. Nudi anu bakûlâme ku bilele byenu bya cyena mangumba abi bidi byamba ne bintu abi mbîmpè. Nudi nwakula mu myakulu, nutupika nuya muulu nudikuma panshi, nwimba misambu mu nyuma, cibi nukosa nsuki. Nudi mwa kudifwanyikijilaku mwena Kilisto wa wenza nanku anyi?

Mêmè ewu nkaadi mumone badémmons, nkaadi mumone bampakaamanga balume, nkaadi mubamone baakula mu myakulu kadi kuyandamuna, ne kutupika kuya muulu kudikuma panshi ne kuja maja mu nyuma; banwina mashi mu kabalubalu kaa mutu wa muntu, kadi kwela Dinà dya Yesu Kilisto mulawu.

150 Udi wamba ne: “Mêmè ndi mwena ekeleeziya. Aleluuyah! Butumbi kudi Nzambi! Ndi. . .” Udi mwena cinyi?

Ekeleeziya n’Dìyì! Ne Dìyì didi dyamba ne: “Mbundu paudi wenza nanku.”

Nwènù musumba wa Bafaalesa bafofomija, nwenda nulombola bânà badi bakwate ne bya luse abu bwa kabafikisha too ne mu iferno mushindu awu; anu bwalu udi uciina bwa kulenga kwebe kùdì udiila, ne mbafwanyine kukwipata mu dingumba dyenu wêwè mubange cintu kampanda pa Cyôci aci. Bundu bwebe, cyena lubombo naanyi we! Ikala wêwè ne bundu bwa aci nanku. Mumone anu mudi dîbà dyenda diseemena emu, cibi bwa bilele byenu wela Dìyì dya Nzambi nyima. Upeta peebe ne dikamakama adi, mufofomija naanyi we!

¹⁵¹ Bible katu mwambeku ne wêwè ewu ukaavwa mufofomija anyi? Kwèna mwa kuumvwaku ne udi mpofo anyi? Bible mmwambe ne ke cyûkaavwà. “Ne udi butaka, mukengi, mukengeledi, mpofo, kadi kuyi mumanye to.” Panudi nwela meeji ne nwènù ke badi ne ekeleeziya udi mutambe bunene mu cimenga, ne biikale nwenza *cikampanda*, *cikansanga* anyi *cikankenga*; kadi Bible udi wamba ne nudi balanda bapange ne mwa kulandika, ne nudi bampofo. Ne Yêyè uciidi anu kacya wimana ku ciibi, ukeba bwa kukusumbisha bwanga bwa mèsù; kabuyi bwa ukusumbisha to, ukupeeshabu, kadi wêwè kuyi muswe kubwakidila to. Aci cidì cyuja Mifundu.

¹⁵² Nudi ne mwoyi mu dituku kaayi, balumyana? Nudi bajingulule dîbà, bajingulule cimanyinu anyi?

¹⁵³ Bu bobo anu bafwanyine kufika ku dyumvwa, bakaji abu, ne ndyabulu. Ndémon wa busenji, muvwale dînà dya ntendeleelu. Mushindu awu ke utuye misangu yônsò. Wakalwa kudi muprofeta yônsò, wakalwa kudi mwena lungenyi yônsò, wakalwa too ne kudi Yesu Kilisto mwine, bu mudi muntu mutendeleedi. Ne Bible mmwambe ne neyikale “mitambe kutwangana nkundu mu matuku a ndekeelu,” nansha beena Mpenta biine, “ne mifwanyine kuseeswisha ne basungula biine,” ipatukila mu ekeleeziya wa Mpenta awu, “bu ne bivwa mwa kwenzeka.” [Katupa kaa mukaba wa mêyì munda mutupu—Muf.]

¹⁵⁴ “Bakese menemene,” mwakambaYe, “bwalu mushiku wa mbelu mmubumbakane ne njila mmubulakane, ne nekwikale anu bakese menemene baamupeta. Bwalu anu mwakadibi mu matuku a Noa, mwakasungidibi bwa misuuka mwandamukulu, ke mwikalabi kabidi ku dilwa dya Mwânà wa muntu.” Anji elaayi meeji pa bwalu abu! Ndituku kaayi ditudi ne mwoyi edi? Nudi bajingulule dîbà, bajingulule dituku anyi?

Ndi munkaci mwa dyangata dîbà dyenu dyàbûngì be, kadi ncidiku ne ndambu wa tusunsa. Nwamonu anyi?

¹⁵⁵ Babafikisha ku dikosa dya nsuki yabo. “Ee,” mudibo bamba, “wetu ekeleeziya katu utangila biine abi to.” Nudi bamanye ne mbwa cinyi? Bakaadi mpofo.

“Kakwena bubu bu nwênù mwa kukosa nsuki to.” Bible udi wamba ne mbibi! Cidi mene cintu cya bundu bwebe wêwè paudi ukosa nsuki nanshà mene bwa kusambila.

Udi wamba ne: “Ee, mukaji’s bidi bikengela ikale ne mutu wende mubwikila.” Kadi Bible’s mmwambe ne “nsuki” yende ayi ke cyende cibwikilu. Kî ncifulu to; nsuki yende!

¹⁵⁶ Amba tǔng bu Mòsà mwambe ne: “Nèngùmushè cifulu pamutu paa kuumusha bisabaata”? Kabivwa mwa kwikala bikumbane to. Nzambi Yèyè uvwa mwambe “bisabaata,” ne Nzambi civwaYe muswe kwamba mbisabaata.

Yèyè mmwambe “nsuki,” kî ncifulu to! Butumbi kudi Nzambi! Ke cidiYe munange, ndi mutwishii bwe nanku. Butumbi kudi Nzambi’s we! CidiYe muswe kwamba cidi anu cidiYe wamba aci. Mifundu kî nya muntu udyumvwijiila paa nkaayende to. Dyumvwija adi kadyena anu bwa dingumba dyenu to; cidiWu muswe kwamba cidi anu cidiWu wamba aci, ne Yèyè mwine ke muumvwiji.

¹⁵⁷ Wèwè udi wamba ne: “Mémè’s ndi mumanye mukaji utu wenza ciine aci.” Ncyèna ne bwalu ne cyùdi wèwè mumanye aci to. Mémè ndi mumanye cidi Nzambi mwambe pa bwalu abu. Wèwè enza muwaswa amu.

¹⁵⁸ Bu bôbò nanshà mwa kujingulula cidi bwalu, inābānzà. Uh! Bu wèwè nanshà mwa kujingulula’s we! Anyi, “mukaji,” kî nyinābānzà to.

¹⁵⁹ Mvwa mumone cibayabaya cifunda, pāmvwà mpweka mfumina ku Blue Boar, mu dipweka amu, ngela meeji mmu Musèèsù Mwitānù mwamwa, ngāndā mukwabo wa maala a bière, bafunde ne: “Meesa bwa bainābānzà.” Mémè kwanji kwimana mwaba awu; mémè ne: “Kanutu banji kwikalaku nanshà nende to.” Inābānzà wetu ewu kaakuya mu mwaba bu nanku to. Bwa mukaji yèyè mmufwanyine kuyamu, kadi kî nyinābānzà to.

¹⁶⁰ Nukaadi bamone ne, cibula cya buloba ebu cyakabanga ne masandi a mukaji anyi? Nudi bamanye ne ndekeelu udi ne cya kwikala mushindu umweumwe awu, masandi a mukaji anyi? Ne ekeleeziya, mu cimfwanyi, mmukaji? Ekeleeziya mmukaji, mu ngaakwilu wa mu nyuma.

Nansha Mukaji Musela kabidi mmukaji, mu ngaakwilu wa mu nyuma.

¹⁶¹ Masandi a ekeleeziya, mushindu udiwu menze! Tangilaayi bikeena-kumona, tangilaayi bintu, monaayi bikeena-kumona nansha bidi Nzambi ufila, ne cikeena-kumona aci ncilelela. Nyewu ndi ne Bible wanyi muteeka pa mwoyi wanyi, bwenu nwênù badi bateelejila ku mukaba wa mēyi; bateeleji badi mwa kumona cyôci aci. Mémè mvwa mucimone! Nzambi wa Bukole bwōnsò mmumanye ne m’Bulelela. Ncivwaku mucimanye to too

ne mpindyewu. Ke yêyè awu, “butaka, kadi kayi mumanye to.” Yêyè uvwa anu mu dicyonkomoka. Ke nwênù abu’s.

Kadi Mukaji Musela mukese awu paakamwenekaye, bivwa bishiilangane. “Alpha ne Omega awu!” Uh-huh.

¹⁶² Dyabulu ngudi ucyenza. Kadi anu mwakadi beena Yuda ba kalekale abu, padibo bamona Dîyì . . .

Kadi Yesu wakambila Bende, Yêyè wakambila bayiidi Bende ne: “Kenketaayi Mifundu. Nwênù, nudi bamanye, nudi nuumvwa binupite mitu bwanyi Mêmè ne bwa mudimu Wanyi wa bwambi. Kenketaayi Mifundu. Mu Yôyì ke munudi nwela meeji ne nudi ne Mwoyi wa Cyendeleele, kadi Yôyì ayi’s ke idi imfidila Mêmè bujaadiki, Yôyì nyidi inwambila cidi Mukenji Wanyi. Panwikala kanuyi mwa kungitabuuja Mêmè, itabuujaayi Mèyì miine adi Nzambi unuumvwija awu.”

¹⁶³ “Katwakwitabaku bwa Muntu ewu atukookeshe to. Tudi ne baakwidi beetu twètù biine, ne bikwabo.” Nwênù ndaayi anu kumpala mwine, ke cyònsò cidi mwa kwambiibwa. Byôbì biine, dîbà dikaadi dimane kupita. Nwamonu anyi? Bilele bya cyena mangumba biikale byamba byôbì ne mbîmpè, paabo bateeleja biine abi. Bipiciibwe ne bateeleje. . . Nudi nwitabuuja dî—dîyì dya—dya muntu kupita kwitabuuja kwa Dîyì dya Nzambi. Kabeena bajingulula to. Ekeleeziya leelu ewu kayena ijingulula Timote Mwibîdì 3 to. Nwênù ba- . . .

¹⁶⁴ Ndi mmona bamwe beenu biikale bafunda Mifundu. Mpindyewu, eyi m’Mifundu îndì ngangata mwaba ewu. Mbwa ne, byôbì mwa kwenzeka ne muntu akoke ntema yaanyi ku cyôcì eci, anyi uswa kumpiishilapu, mmone mwa kuleeja Mufundu udi ucitangila. Nwamonu anyi?

¹⁶⁵ Kabeena bajingulula Timote Mwibîdì 3 to, mudiCi cyambe ne: “Mu matuku a ndekeelu, bantu nebiikale beena mutu mukole, badibandishi, banangi baa bisankasanka kupita kunanga kwa Nzambi, kabayi bakumbaja mèyì adibo bamba, basongwedyanganyi, kabayi ne kudikanda, ne bapeetudi ba beena maalu mîmpè (Mukaji Musela), nwamonu’s; biikale ne cimwenekelu cya difwana dya Nzambi, kadi biikale babenga kwitaba Bukole bwadi; udisake kule ne baa nanku awu. Bwalu bôbò baa mushindu ewu aba ke badi baya ku nzubu ne ku nzubu, biikale balombola bakaji bakutakane, bakaji bakutakane biikale balalula kudi nkuka mishiileshiilangane, kabayi balongaku anyi kabayi mwa kwikalaku bakumbane kufika ku dimanya dya Bulelela to.” Kacya! Kî mbafwanyineku kukufika to, ne kabaakukufika to. Nzambi ngudi mwambe nanku.

Nenku, wêwè Mufaalesa mpofu ewu, kwênakù mwa kumona aci anyi? Ncyèna mufiike munda to; cîndì ndi anu mpoopela musonso bikole cyanaana bwa ukwate bikole. Nansha ekeleeziya kayeena ijingulula Cyôcì eci to. Bakaji kabeena mwa

kucyumvwa to. Badi ne cya... “Bakaji bakutakane, biikale balalula kudi nkuka mishiileshiilangane,” Hollywood, mishindu yônsò ya bintakanyi eyi, nsuki mibebula, bavwala tuputulu, badilaaba bilaabu kwisù, mishindu yônsò ya bintakanyi ebi eyi, bidi kabiyi bikumbane to. Nudi bamanye ne mukaji udi ne mudimu munene wa dyenza mu matuku a ndekeelu anyi?

¹⁶⁶ Nudi bamanye ne Bible mmwambe, ne: “Aba biikala mwa kupanduka ku dipiishiibwa dinene edi nebiikale ditamba dilenga kumpala kwa Mukalenge”? Dîngà dituku nêmfikè ku aci, bu Mukalenge mwa kwanyisha, bwa cyôci aci, bwenu nwênù bakaji. Nênnùleejè cidì Nzambi wela meeji bwa mukaji wíkala bulelela mwa kupanduka ku dipiishiibwa edi dya dituku edi. Mmwambe ne: “Yèyè neikale mulenga.”

¹⁶⁷ Mvwa muumvwe mukaji kampanda, dîngà dituku, mwikale useka... Mwânà wa bakaji, musumba wa bakaji cibwîpì ne kwikala butaka, biikale ne maalu a mu nsômbelu mashaadile bikole kupita a—kupita a maamu mbwa, mwikale useka mukaji mukulumpe uvwa ne nkanzu mule. Teeleja kunu, kaawêwè kakaji kadi kenda kajekeja nyima aka, yèyè awu udi ne cintu cyûdì wêwè awu kuyiku mwa kumanya ne cidì bishi to. Yèyè awu’s udi ne maalu mîmpè a mu nsômbelu. Kwêna nanshà mumanye dînà adi ne ndya cinyi to. Ukaadi mudijimijile anu mu kalaalu kaa ku bwânà, mwambe kujimija. Kwêna nanshà mumanye kusunguluja maalu mîmpè ne ne maalu mabi to; yèyè awu mmumanye. Yèyè udi ne cintu kampanda cisokome munda mwa mwoyi wende cyûdì wêwè awu kuyiku mumanye to. Wêwè ukaadi mucijimije; kuciyi mwa kucipetaku kabidi to. Kumubiikidi yèyè awu ne ngwa mushindu wa cyena kale, ne bikwabo to, mushindu awu. Mmumanye cintu kampanda cyûdì wêwè kuyi mumanye to. Mu mwoyi wende amu, mudi mabanji a nsômbelu mulenga miikale masokome. Kwêna mumanye mwaku nansha umwe bwa cyôci aci to. Mamwêbè webe wêwè mmukukoleshe pende anu nanku awu. Mpaasata webe mmukwitabileci; bileeja mwaba udiye mwimanyine. Yèyè ke ûnkaadi nyiisha mpindyewu ewu. Wamonu anyi? Nudi numona mwaba unudi anyi, nwênù maekeleeziya?

¹⁶⁸ Yesu wakamba ne: “Mufundu ewu udi ne cya kuula wônsò.” Ne Wôwò mwine mmûle.

¹⁶⁹ Tangilaayi numone: “Anu muvwa Yane ne Yambele bakandameene Môsà,” yèyè neañji kulonda, bamwe baa kudibo. To, mpindyewu, kî mba-Méthodistes, ba-Baptistes badiye wamba to, mwab’ewu; abu badi pambelu paa cimfwanyi eci. Nuamonu’s? “Kadi anu bu muvwa Yane ne Yambele bakandameene Môsà ne Aalona, ke mwenzabo paabo; bantu baa meeji mooneke pa bidi bitangila Bulelela,” babitwishe katungu kubivwija mêyi maswika ne malongesha a ekeleeziya, pamutu paa Bible.

Ne pashiishe Yane ne Yambele bavwa mwa kwenza cintu kana cyònsò civwa Mòsà mwa kwenza aci. Nwamonu's, "anu muvwa Yambele," nudi numona cintu cifwanangane mwaba awu anyi?

"Anu muvwa Yane ne Yambele bakandameene Mòsà, ke mudibo benza kudi bantu baa meeji mooneke pa bidi bitangila Bulelela aba, baBukandameena," kabaakunanga nanshà bwa kwikala naaBu mutumba to, kabaakunanga nanshà mene bwa kwelangana naaBu diboko to, kabaakujinga kwikala ne dipetangana nansha dimwe naaBu nansha. Kadi mbambe ne: "Dipaala dyabo nedimanyike." Piikala Mukaji Musela awu mwa kwimana pa kaaba Kende ne kubanda mu maulu, nedimanyike, kanutacishi meeji to; anu bu Mòsà, paakangataye bânà baa Izaleela, ne kubuukaye kupatuka mu Ejipitu, ne Ejipitu kufwa mu mâyi. Eyo.

¹⁷⁰ Yesu wakamba ne: "Mufundu wònsò wakafidiibwa ku disonsodiibwa, ke bwa cinyi Mufundu wònsò udi ne cya kuula." Dìbà divwaYe. . .

BaakaMukonka, bamba ne: "Udi udivwija Wèwè mwine Nzambi."

¹⁷¹ Yèyè ne: "Nwènù aba, mu mikenji yenu mene, nudi nubiiikila baprofeta badi Dîyì dya Mukalenge dilwa kudibo aku, nudi nubabiikila ne 'banzambi,' ne ke cidibo." Yèyè ne: "Kadi mmunyi munudi mwa kumpiisha Mèmè pândi ngamba ne Ndi Mwànà wa Nzambi? Mifundu yònsò eyi's yakafidiibwa ku disonsodiibwa; umwe ne umwe wa ku Yôyi ayi's udi ne cya kumweneshiibwa, umwe ne umwe wa ku Yôyi ayi's udi ne cya kuula."

Monaayi mwaba awu, bôbò badi anu mpofo yetu eyi, bavwa bangaciibwe bikole ku dîyì dya bantu pamutu paa kwikala bangaciibwe ku Dîyì dya Nzambi. Ke cidi cifikisha bakaji ku dyenza nanku awu. Ke cidi cifikisha bayiishi ku dyenza nanku awu. Mbangaciibwe kudi mwepiskopo pamutu paa kudi Yesu. Mbangaciibwe mu cyôci aci, ne cyabo—cibucilu cyabo cya mfranga, disangisha dinene.

¹⁷² Anji monaayi tũng mèmè ewu ne ndi mumanyike. Anjaayi kwangata bantu, baa mu Jeffersonville, kufwanyikija ne cidi kasumbu kakese kadi apa mu Jeffersonville aka; angataayi baa pambelu, paa Jeffersonville, kubuumusha mu tabernacle ewu mu dinda emu, ncyêna mufwanyine kwikala anyi ndi mufwanyine kwikala anu ne bantu basambombo baa kuyiisha. Ncinyi aci? Yèyè mbamwenze ne bantu bònsò baa ditunga dijima; baa mu New York, baa mu Massachusetts, too ne ku Boston, Maine, Tennessee, Géorgie, Alabama, ne myaba yònsò ya ditunga. Badi badisanga pamwe. Amen! Ke cyakambaYe aci. "Nekwikale Bukênkè lwa pa dìbà dya diloolo."

173 Bôbò kabeena mwa kujingulula Bukênkè bwa diloolo to. Ke lutatu ndwalu. Yèyè kèna anu uBujingulula to. Mmutambe kufofoma be. Bible ngudi mwambe ne mmufofome.

174 Russie mmupete anu kaaba kende pa buloba, mu maalu a mamanya, kukaadi bidimu kabiyi pipite pa makumi anaayi to. Nudi bamanye, dîbà dyakenzeka Mvita ya Kumpala ya Buloba bujima, bôbò abu kabavwaku... Kabavwa bamanye Russie to. Mwaneetu Roy... Bavwa anu musumba wa binyonga, bi-Sibériens bya kale abi, ne myevu ku cibanga kwônsò eku, kabayi mwa kusunguluja ne cyaanza cya dyabalume ncyèpì ne cya dyabakaji ncyèpì to. Ncya bushuwa, Russie, kadi's wavu kujingulula kaaba kende. Bivwa bikengela kwenzaye nanku bwa kuuja Mifundu. Nudi bamanye biprofeta byanyi bwa cîngàakambà ne necyenzeke, muvwabi byônsò ne cya kudisanga mu communisme. Patudi twakulangana apa yèyè ngudi ulombola buloba bujima mu maalu a mamanya. Twètù's tudi bashaadile kule kwa dikema paanyima pende. Bakwabo bônsò baa pa buloba badi paanyima pende yèyè. Yèyè ukaadi ne kaaba kaa mulombodi. Wáfumu ku dijingulula ne udi ne mitu ya bwongo, yèyè pende.

175 Tangilaayi, muntu udi ne byumvwilu bisambombo anu bimwebimwe bivwaye naabi kukaadi bidimu binunu bisambombo. Kukaadi bidimu binunu bisambombo, ne byumvwilu biine bivwaye naabi abi, uvwa ubwela mu dipetangana ne cisòmbedi cyende cya pa buloba mwikale ukwacila Nzambi mudimu. Kadi mpindyewu, mu bidimu makumi mwandamutekete ne bitaanu bishaale ebi, mbidi muntu awu muumuke ku kabalu ne kashinyi kaa nkata inaayi kaa bakoka kudi tubalu, mufike ku mubandi wa mu mabulunga. Mbwa cinyi? Mmwele nyima diitabuuja dyende mu Nzambi, yèyè kudifila ku byumvwilu byende ne ku bukole bwende bya bu muntu. Nukaavwaku bamone cyôci aci anyi? Wakuumuka ku dyyeyemena Nzambi. Ukaadi udyeyemena yèyè mwine.

176 Bu mukaji mwena bupidya ewu. Dyende dînà nganyi apa's, Washington kuntu kwaka, wâkashintulula byônsò ebi awu? [Muntu mukwabo udi wamba ne: "Murray."—Muf.] Dyende nganyi? ["Murray."] Murray, kwambaye ne: "Bu mutudi ne cilwilo ne mazuwa a mvita, katwena dijinga ne Yehowah wa kale awu to." Uh-huh. Bwanyi mêmè nansha twètù ne cinyi.

Anyi n'Yehowah anyi ncijengu, bwanyi mêmè. Cilwilo ne mazuwa a mvita bipweke ne mâyi, ne byôbi biine nebipweke ne mâyi, kadi Yehowah neashaale kashidi. Bu mûndi citupa Cyende Yèyè, ne mwanende Yèyè, nênshaalè Nende kashidi; kabiyi ku dibiikila anyi ku disungula dyanyi mêmè to, kadi ku disungula Dyende Yèyè. Amen, amen! Nciwua mêmè ne cya dyenzamu to. Yèyè ke mwena bwalu! Umpe Yèyè awu anyi umpe lufu. Matunga ajuuke ne adishinde; Yehowah neashaale. Yèyè ukaadi mucyênzènze, munda mwa bikondo byônsò; paakadishinda

Loomo, paakadishinda Ejipitu, ne matunga makwabo ônsò akadishinda. Kadi Yèyè uciidi mushaale anu Yehowah. Kaa, aleluuyah's we! Kadi ngădyŭmvù kwoko mutendeleedi.

¹⁷⁷ Cidi cyenze ne Russie adipetulule, bivwa bikengela anu adipetulule. Anu muvwabi bikengela ne Izaleela aye mu buloba bwende. Bivwa bikengela Nzambi asake Izaleela amwaluje mu buloba bwende, bwa Mpungi. Nenku bivwa bikengela kabidi Nzambi asake Russie kwaka, mu communisme, bwa kwenzaye anu menemene cidi ciprofeta cyambe ne neënzè.

¹⁷⁸ Muntu ne byumvwilu byende bisambombo uvwa ufuma ku difika, ku kashinyi kaa nkata inaayi kaa bakoka kudi tubalu, mwikale mweyemene Nzambi. Munda mwa bidimu makumi mwandamutekete ne bitaanu bishaale ebi, ke yèyè kulekela dyeyemena Nzambi. Paakatwabo byàlà pa mukanda wa mēyi makulu a ditunga edi dya États-Unis, baakateeka Nzambi mu kantu ne kantu kônsò kaakenzabo. Mpindyewu kabacyena benzaku nanshà cisangilu ciine, ne kabacyena bateelaku nanshà Dîná Dyende to. Ncya bushuwa. Bakaadiku anu beeyemene didibandisha didibo naadi mu maalu a mamanya abo, bôbò, budimu mu maalu abo a mamanya, dintamfu dya maalu a busenji. Acì ke cya bushuwa menemene. Buloba bujima mbutukine mu dipanga dya Bible. Bi- . . . buloba bujima mbwele Nzambi nyima.

Kadi, anji elaaayi meeji, anu munkaci mwa biine byônsò abi ne, ekeleeziya ya cyena mangumba ne maalu ônsò a busenji a ma-seminere ne byônsò abi, Nzambi mmwangate Dîyi dya baprofeta Bende kadi kukosolola Mukaji Musela wîkala mwa kwitabuuja. Mmwambe ne Yèyè neàcyènzè. Ku ciine cintu aci ke Yèyè kupempa civwaYe mulaye ne Yèyè neënzè.

¹⁷⁹ Bôbò mbeeyemene meeji abo a buntu, maalu a mamanya abo a buntu, ne bikwabo; mushiye Nzambi ku luseke, Mwine uvwaye mweyemene kale awu. États-Unis mmushiye Nzambi ku luseke. BaaMwipaci too ne mu tulaasa, bwalu bânà beetu balela baa batekete aba kabacyena nanshà ne mushindu wa kuumvwa baakula bwa bwalu Bwende to. MbaMwipate mu tulaasa. Mpindyewu badi bakeba mushindu wa kuMwipata pa ndola pàtù ne: "Nzambi ngutudi beeyemene." Nebacyŭmushè ku dicipa dya cyeleka mwinshi mwa dibendela dya ne: "Ditunga dimwe mu bukookeshi bwa Nzambi." Nebiipate ciine aci.

¹⁸⁰ Monaayi, mbye ku njiya yabo ne byumvwilu byabo bôbò biine. Bwalu, mu bidimu makumi mwandamutekete ne bitaanu bishaale ebi, kî mmushintulule kantu nansha kamwe mu byumvwilu byende to, yèyè uciidi anu muntu umweumwe awu anu mwakamufukabo kudi Nzambi ku cibangidilu amu.

Kadi, mu matuku a ndekeelu aa, kanwenaku mwa kujingulula ne tukaadi penyi anyi? Ne ekeleeziya wèdì Nzambi nyima, kutangija ku aci, ku seminere ne dilabula, ne bikwabo,

pamutu paa Dìyì. Kabeena nanshà baMumanya mu bisangilu byabo, mu tulaasa twabo, anyi nì mmu cinyi kabidi, nansha.

¹⁸¹ Izaleela, mu bidimu makumi abidi ne bitaanu bishaale ebi, wàjingùlùlù ne ncintu kampanda cidi cibafikishe mu buloba bwabo, bu muvwabi bilaya. Kì mbamanye ne ciine aci ncifike ku dyenzeka bishi to. Bavwa bakenga dikenga dya njàjàmà, babashipa bwa diitabuuja, mu cikondo cya Mpungi ayi, kadi bakaadi mu buloba bwabo. Kì mbamanye ne mbwa cinyi to.

¹⁸² Russie mmutabuluke bwa cinyi? Matunga mmatabuluke bwa cinyi? Muntu mmupete mushindu wa kwenza bidiye mwenze ebi bwa cinyi? Paabi's beena maalu a mamanya, kukaadi bidimu nkama isatu, mwena maalu a mamanya mukwabo wa cyena France wakendesha anu ndundu wetu ewu panshi mu lubilu kampanda, ke yèyè kufila bijaadiki, ku dikebulula dya mu maalu a mamanya ne: "Muntu yèyè munyeeme lubilu lwa kanyingunyingu lwa miles makumi asatu [kilomeeta 48] ku dībà dimwe, bukole bwa dikokangana dya mibidi mbufwanyine kumuumusha pa buloba; bilondeshile bujitu bwende, bilondeshile bujitu bwa ndundu." Mpindyewu nyewu ukaadi wenza miles binunu dikumi ne mwandamutekete [kilomeeta 27.200] ku dībà dimwe, nwamonu's, mucikàle anu uteeta bwa kubanda. Walu kujingulula cyòci aci, paanyima. Bwa cinyi? Bikengela biikale mushindu awu.

¹⁸³ Mona's, ekeleeziya uvwa ne ciibidilu cya kwimana pa dibwe dya Yesu Kilisto. Nansha muntu kampanda mwambe cinyi, bavwa bashaala anu ne Dìyì adi, mukenji wa cikondo; Luther, Wesley, too ne kwinshi kwaka. Kadi mpindyewu bakaadi baalukile ku bilele. Mbwa cinyi ncyenze nanku?

¹⁸⁴ Bidimu makumi abidi ne bitaanu bishaale ebi, Izaleela walu kujingulula ne badi mu buloba bwabo mbwa cintu kampanda. Ciprofeta cikaavwa cyambe ne bavwa ne cya kusangishiibwa cyakabidi; Hoshea ngwákacyàmba. Twacibadi kukaadi katanci. Nzambi atukwacisheku bwa tucyùmvwè! Eyo.

¹⁸⁵ Pa dībà dimwedimwe adi, Mukaji Musela wàjingùlùlù Bukênkè bwa diloolo, mmubange anu kujingulula cyanaana. Beena mpenta badi ne nzala mbabange kujingulula ne mangumba awu kaena ne bintu biine bivwabo bakeba to, mmatambe kukonyangala ne kutapuluka. Nwamonu's, ke dībà dya kujingulula ndyedi, kujingulula. Bikengela ujingulule.

Baa pa buloba baàjingùlùlù. Matunga àjingùlùlù. Maalu a mamanya àjingùlùlù. Dyabulu wàjingùlùlù ne dībà dyákànyì dya kupwekesha bakaji ne màyi, kupwekesha ekeleeziya ne màyi, kupwekesha bantu ne màyi. Yèyè wàjingùlùlù cyòci aci.

Ne Nzambi wàjingùlùlù ne kudi cisamba pa buloba cikaavwaYe mudyanjile kulongolwela Mwoyi. Wàjingùlùlù ne ke cikondo ncyòci eci cya kutuma Mukenji Wende. N'Yèyè

ewu wāwūtumu. Cisamba cyāWūjingŭlŭlù, cikondo cya Mukaji Musela cyafiki ku dimanya Bukênkè bwa diloolo.

¹⁸⁶ Bu Sodoma mujingŭlŭle matuku ende awu, paakamonaye baamusanjeela abu bapwekamu, benze bu Billy Graham ne Oral Roberts!

¹⁸⁷ Mpindyewu, muntu mukwabo wa maalu a busenji mu Phoenix nyawu wajuuku wamba . . . mwele katupa aku kaa mu—mukaba wa mēyì, mwikale wamba ne mēmè ndi mwambe mwaba ewu ne, ndi “ne cya kubatijiibwa mu Dìnà dya Yesu,” mēmè ngamba nanku awu. Ke pashiishe yēyè ne: “Mpindyewu’s nudi numona *apa*, mwaba ewu mmwambe. . .” Piine apu mpāmvwà ngakula bwa Afrike, muvwabo babatiiza misangu isatu cyādì panshi, ne cyādì muulu. Ke yēyè kwamba ne mēmè mvwa mwambe ne: “Kakwena dishiilangana to.” Nwamonu’s, yēyè kī mmweleku citupa cya mukaba civwa cilonda to; mmwela anu katupa aku, kadi kukakosa.

Aci, ncifwanyine kwikala cilumbu cya wediibwa mu buloko bwa kwenza kwa nanku awu. Mikaba ya mēyì ayi kakuyi mpata to idi anu bakupeeshe dyanyisha. Muntu nansha umwe kēna mwa kudibwejakajamu to. Kudidingi kudidingi. Wa—wakebi bwa mikenji ya ditunga ikulumbate. Kadi twētù mbadi bafwanyine kucyenza anyi? To. Yēyè mmwambe ne: “Ubalekele.” Nzambi mmungambile ciikala mwa kwenzeka. Shaalaayi anu batangile cyanaana, ikalaayi anu ne dīsù pa mwine muntu awu. Nwamonu anyi?

¹⁸⁸ Pa dībà dimwedimwe adi, Mukaji Musela wàjingŭlŭlù Bukênkè bwa diloolo.

Bu nanshà Sodoma mujingŭlŭle dībà dyabo!

¹⁸⁹ Mpindyewu, mwine muntu umweumwe awu mmwele pa mukaba apu, wamba ne: “Tangilaayi kuneeku, nwènù beana Mpenta,” ne, “ne nwènù ba-Baptistes. Muntu ewu, muprofeta wa mashimi ewu, William Branham,” nwamonu’s, “mmwambe ne Oral Roberts ne Billy Graham bavwa mu Sodoma.” Nwamonu’s, kadi kukosa mukaba; kwajiki, nwamonu’s.

Kayi muswe kutungunuka bwa kwamba, ne: “Bavwa baamusanjeela batumina Sodoma” to. Kī mmu Sodoma to: “Bavwamu bu baamusanjeela batumina Sodoma.” Muntu yōnsò mmumanye ne ke cīmvwà mēmè mwambe. Ela mukaba webe wa mēyì.

“Ewu yōnsò wīkala mwa kuumushila anyi kusakidila, cintu cimwecimwe aci nebamuumushileci.” N’Dīyì dya Mukalenge. Didi dishaala mushindu awu.

¹⁹⁰ “Bu nanshà Sodoma mujingŭlŭle mukenji wende, nunku mmushaaleku too ne leelu ewu,” mwambile Yesu, bu yēyè mujingŭlŭle mushindu umweumwe wakajingulula Abraham awu.

Abraham uvwa mumanye ne kuvwa mwânà wa balume mulaya uvwa ne cya kulwa. Kadi uvwa mumanye ne kuvwa ne cya kwenzeka dishintuluka dya mushindu kampanda, bwalu ukaavwa mukulakaje biye ne kwa naka, nansha Sarah pende. Kadi paakamonaye Yèyè Wākamanya mwa kujingulula meeji a Sarah awu, paanyima Pende, wakajingulula dibà divwaye ne mwoyi. Kwambaye ne: “Mukalenge wanyi, lekela nye kakeba ndambu wa mâyi kaaba aka bwa kuKwowesha ku makàsà.” Bòbò kudya cipese dya dyâmpà. “N’Kulombeku, shaalaku katanci kale ndambu,” nwamonu’s, apa, “M-u-k-a-l-e-n-g-e wanyi,” ne dileeta dinene M-u-k-a-l-e-n-g-e, “Elohim.” Yèyè kujingulula ne uvwa n’Nzambi mwikale wakula nende mu mubidi wa buntu. Wakajingulula cimanyinu cyende, ne wakabeneshiibwa kudi Mukalenge.

Sodoma kaakajingulula dituku dyabo to, nenku yèyè wakooshiibwa kubutuka. Yesu wakamba ne: “Anu bu mwakadibi mu dituku adi, ke mwikalabi kabidi piikala Mwânà wa Nzambi . . . anyi Mwânà wa muntu mwa kumweneshiibwa.”

¹⁹¹ Mpindyewu, ekeleeziya kî mmujingùlùle dituku dyende to. Anu bu Izaleela, babapingaje ku bukole mu Palestine, nebamubweje ku bukole mu Nsangilu wa Ma-Ekeleeziya wa Buloba bujima. Bwa cinyi? Kî mmujingùlùle dibà dyende to. “Nwènù bantu, patukaayi munkaci mwende, kanwikadi nwâlwa kwabanyangana nende mpekaatu wende!” Nyeemaayi, bwa kudisungila, cyanaana nenupeteke nukaadi ne cimanyinu cya nyama wa lwonji nenku kanuciyi kabidi ne cya kwenza pa bwalu abu nansha cimwe.

“Ewu udi mukooyike atungunuke anu ne kwikala mukooyike. Ewu udi wa cijila,” kabiyi ne *wikala* wa cijila to, “wa cijila mpindyewu. Ewu udi wa cijila,” kî mmukaji mubeb- . . . wa nsuki mibebula to; kèna mwa kwikala wa cijila to. Mpindyewu, aci cididimweka cya ciipanshi be, kadi’s ke Mufundu awu. Bible udi wamba ne: “Udi ufwishu mutu wende bundu,” ne mutu wende’s mbayende. Mutu wa bayende n’Kilisto, pa nanku mukaji ewu udi ufwishu Kilisto bundu. Mmunyi mudi mukaji mwa kwikala “mufwishiibwe bundu” padiye kayi “mukooyike”? “Mukaji udi ne nsuki mibebula ayilame. Mulume, mukaji udi uvwala tuputulu atungunuke yèyè anu ne dituvwala. Ewu udi ubenga kwitaba Dìyì atungunuke yèyè anu ne kubenga kuDiiitaba.”

“Kadi ewu udi wa cijila atungunuke anu ne kwikala wa cijila. Ewu udi mwakane atungunuke anu ne kwikala mwakane; Dìyì dyakane dya Nzambi, Mwânà wa Nzambi mumweneshiibwe. Atungunuke anu ne kwikala wa cijila, atungunuke ne kwikala mwakane!” Jingùlùlà! Eyowa’s, mukalenge! Matuku kâyi . . .

Ekeleeziya kî mmujingùlùle dituku dyende to.

¹⁹² Bu mudi Izaleela, mupingane mu buloba bwende bulaya, kî mmumanye ne mmumupingane bishi to. Mbamupingajemu biikale bidyènzèkèle. Bwa cinyi? Bukole bwa ditunga mbwakamuteeka pa kaaba kende.

Mpindyewu ndi muswe kwamba cintu kampanda. Bukole bwa ditunga mbwakabweja Izaleela mu buloba bwende; bukole bwa ditunga nebubweje ekeleeziya mu Nsangilu wa Ma-Ekeleeziya wa Buloba bujima; kadi bukole bwa Nzambi nebubweje bantu mu Mukaji Musela. Baa pa buloba badi benzejangana bwa kuya *eku*, ne baa pa buloba badi benzejangana bwa kuya *kwaka*, kadi Nzambi udi wenzejangana bwa kubanda muulu. Nyuma wa Nzambi, udi mwikale Dîyi dya Nzambi, “Dîyi Dyanyi didi Nyuma ne Mwoyi,” ke wateeka Mukaji Musela pa kaaba Kende. Bwalu, Yèyè neajingulule kaaba Kende mu Dîyi, pa dîbà adi Yèyè udi munda mwa Kilisto, neaMuteeke pa kaaba Kende. Bukole bwa ditunga nansha bumwe kabwakucyenza to. Kadi bukole bwa ditunga mbwakasaka Izaleela kumutuma mu buloba bwende; makole a matunga a Nsangilu wa Ma-Ekeleeziya neasake bulongolodi bwônso bwa kububweja munda mwende; kadi Bukole bwa Nzambi nebutuntumune Mukaji Musela bwa kumubweja mu Butumbi, pambelu paa yèyè awu.

¹⁹³ Kaa, balumyana wa yaaya, jingùlùlaayi dituku dyenu, mwakanudimwija Yesu; cimanyinu cya Sodoma, ne ngiikadilu ya ekeleeziya ya dituku edi.

¹⁹⁴ Monaayi cyakambaYe ne necyenzeke mu dituku edi. Teelejaayi cintu aci ne ntema yônso. Cimanyinu cya Sodoma civwa ne cya kwenzeka mu dyôdi dituku edi; cimanyinu bu Abraham, dituku adi kumpala kwa Sodoma, yèyè wâkabiikidiibwa bwa kupatuka awu. Bintu byônso bikaavwâ byamba mu ciprofeta ebi, nebiikale byenzeka mpindyewu. Tangilaaayi bimpè dituku dinudi ne mwoyi edi. Tukaadi babwâmbè babwâmbùlule.

¹⁹⁵ Mpindyewu Yèyè mmulaye bwa kunutumina Bukênkè bwa mu Dyulu, bwa kubobesha Dimiinu-Dîyi divwa mwa kukunyiibwa bwa dituku edi. Dimiinu didi munda *Emu*. Dimiinu m’Bible. Bwa cinyi? Ke mudi Yesu mwambe. “Dîyi n’Dimiinu dyakakunabo kudi mummyaminyi.”

Nenku, mpindyewu, kumpala kwa wêwè kwenza dinowa kampanda, nansha byôbi ne udi umyamina mamiinu, bidi bikengela kwikale bukênkè bwa kubobesha dimiinu diine adi, cyanaana nedibole ne kadyakwikala ne dikwacisha to; nedifwe. Kadi kwôkò kwikale dimiinu mu buloba, buloba bwîmpè, ne bukênkè bwa dîbà bwa mushindu mwîmpè pa dyôdi, didi ne cya kuboba.

Nenku Yèyè wakalaya ne mu matuku a ndekeelu, mu cikondo cya diloolo, Mwânà neapatuke bwa kubobesha Dimiinu

adi. Dimiinu didi munkaci mwa kuyiishibwa. Mwânà wa Nzambi udi munkaci mwa kubobesha Dimiinu adi, mu kuDishindika, mwikale uDitolwesha patooke kumpala kwenu ne mwikale ujaadika ne n'Dilelela. Nudi nuumvwa bwalu abu anyi? [Disangisha didi dyamba ne: "Amen."—Muf.] Jìngùlùlaayi dituku dyenu.

Nkaadi njikija mpindyewu. Dìbà dyākànyì dya kujikija.

¹⁹⁶ Nenku beena Laodikiya babanji, bafofomija, balonge tulaasa abu bavwa mwa kuumusha Dìyì munkaci mwabo. Bakaadi bacyènzè anyi? [Disangisha didi dyamba ne: "Amen."—Muf.] Yèyè ukaavwa mwambe ne nebacyènzè.

Anu muvwa baprofeta baa kalekale batumiibwa bwa kushindika Dìyì dilaya dya dituku dyabo, bwa bantu bavwa badyanjila kulongolola abu, dituku dyabo, baDimone. Anu bu mukaji wa ku ciinà cya màyi awu, bu Natana, bu mpofo ewu Baatimaayo, bu Peetelo, ne bakwabo baabo baakaDijingulula. Yèyè nguvwa Dìyì adi. Nenku cipeta ciine: "Mémè nciyi ngenza byenzedi byakalaya Taatu ne Mémè nèngènzè, nenku kanuNgitabuuji to. Kadi Mémè ngenza byenzedi abi, nansha kanuyi nungitabuuja Mémè to, itabuujaayi byenzedi abi. Byòbì mbidi binwambila ne Mémè ndi Nganyi." Nudi nuumvwa aci anyi? Eyo, dituku kadinupici to, cyàkatùmiibwà. Balume ne bakaji baa matuku makwabo baakaCijingulula, ne baakabwela e kushaalabo mu dikubiibwa.

¹⁹⁷ Beena Mpenta, kaa, ekelekele, mbwa cinyi kanwena nujingulula dituku dyenu? Jìngùlùlaayi dituku dya ku cikondo cya diloolo. Didi apa, nenku didi apa, bwa, bwa kushindika dilwa dya Kilisto, bwa kudishindika. Tudi ku ndekeelu. Jìngùlùlaayi dituku dyenu.

¹⁹⁸ Ndi mumanye ne ngànùlamì ntanta mule. Tukaadi dìbà nkankala mpindyewu. Kadi, mémè ndi muswe eci Cyakudya, Cyòci eci ke Mwoyi. Eyo. Ke cìdìci, bwa mwena kwitabuuja. Jìngùlùlaayi dituku dinudi ne mwoyi, ne cimanyinu cya cikondo.

¹⁹⁹ Monaayi pakaadi kantu ne kantu: Izaleela; pakaadi ekeleeziya; pakaadi masandi; pakaadi Mukaji Musela mwimanyine. Cidi cishaale ncinyi? Cintu cidi cilonda, dyambwibwa dya Mukaji Musela. Mu bushuwa bwa bwalu, ekeleeziya yòsò mmwindile cintu cinene. Mpenta udi wamba ne: "Butumbi kudi Nzambi! Nekulwe dituku diikalabo mwa kwenza *cikampanda*, ne diikalabo mwa kwenza *cikansanga*." Monaayi, bòbò mbajikudi baa ne mukana. Bòbò mbiitabuuje anu cya bushuwa cyetu eci.

²⁰⁰ Bu mudi, musangu kampanda, Kaayifa kwambaye ne: "Kì mbikumbane bwa muntu umwepele kufwaye, pamutu paa ditunga dijima kubutukadi anyi?" Uvwa mwakwidi munene, mudi Bible mwambe, cyakambilaye nanku. Uvwa mwambe ciprofeta, kayi mumanye ciwaye wamba to. Kadi wakafikaku

ku dimanya bulelela bwa ciine aci, bwa ne uvwa munkaci mwa kushebeesha Nzambi mwine uvwaye welela mukana muvwaye mwakwidi Wende awu anyi?

Ke mudibi kabidi, leelu ewu! Mbindile, mwaba kampanda lwa kwaka, bwa ci—cikondo kampanda cya butumbi kulwaci.

²⁰¹ Mona's, ntu nya naabo mu cibilu cya Beena Kantu-ku-byanza. Badi bamba ne: "Butumbi kudi Nzambi!" Bayiishi abu bajuuka basalula anu musumba wa bantu cyanaana, bamba ne: "Kulwalwa ditabuluja dinene. Cyanza cya Nzambi neciikale pa buloba!" Ne mushindu mwine udi bantu baya kumpala, banyeemakanangana bu. . . Kadi kabayi bafika ku dyumvwa ne aci ncyà mu cikondo cya Mpungi bwa Izaleela to. Badi benza nanku bwa cinyi? Mbwalu bôbô mbeena Kilisto badi bajikula anu ne mukana cyanaana, kadi kabayi bafika ku dyumvwa to. Nansha Kaayifa pende kavwa anu mufike ku dyumvwa civwaye wenza aci to. Nenku kabeena bafika ku dyumvwa ne badi munkaci mwa dibenga Mukenji mwine udi mubatamina to. Amen!

²⁰² Katupa kônsò kaa Mufundu, tudi bakalondeshe ku dituku ne ku dituku, ne ku lumingu ne ku lumingu, mu mushindu wa ne cintu m'Bulelela budi kabuyi dyela mpata. "Piikala mpofo kayiyi mwa kuCyakidila," mwakamba Yesu, "nubalekele. Piikala mpofo ulombola mpofo nende, nebapone bônsò mu dijimba." Ncyèna mumanye ne ndîbà kaayi to, ncyèna mumanye ne mpenyi to, kadi ndi mumanye ne cilwalwa.

²⁰³ Nudi bamanye, ngaavu kuumvwa bwa cinyi Sataana kavwa muswe bwa mêmè kwenza cyôci eci to. Makeelela awu, mvwa mudyûmvwè bibi bya dikema. Ncivwaku ne mushindu wa kupeta Dîyi nansha dimwe dya kudi Mukalenge to. Mêmè kwenza mwanyi mwônsò mwa kwenza, nciyi anu mwa kupeta to. Kadi mu dinda emu, pângààjuukù. . . Mvwa mudye ndambu wa matala, makeelela awu, menze anu bu ne mmashaadile anu mu cifu amu. Mvwa nsaama bikole be, mu mushindu wa nciyiku—nciyiku mwa kubyumvwa to. Mêmè kudyambidila ne: "Ke bwalu kaayi ebu's? Ndi mpweka muntu mwamwa, kadi nciyi mumanye cîngààyà kamba to. Nenku, Mukalenge, nyewu nciyiku mwa kupeta Mufundu mu meeji, bwa kuwufunda. Nciyiku mwa kupeta cintu." Ncivwaku mumanye cya dyenza to.

Pashiishe, paanyima paa Mukenji mubange kumvwila, ke Sataana kwikala ukaadi anu wamba ne: "Wèwè's udi udyumvwa bibi bya dikema. Mutu's ngwawu ukusaama. Mwikale usaama. Kwèna mwa kupweka muntu mwamwa to. Kwèna mwa kwimana kuulu kwaka to. Nebiikale *bikampanda*, nebiikale *bikansanga*."

²⁰⁴ Ndi mvuluka, musangu kampanda, muyiki uvwabo balonda wa keena Londres kakwabo mu Angleterre mwamwa. Uvwa anu muntu wetu wa patupu ewu. Nenku bavwa bamba ne mfumu, umwe wa ku bamfumu mu matuku a kale àa uvwa ubwela

mu nzubu wende—wende wa bukalenge. Nenku, ewu, kavwaku ne muntu nansha umwe. . .Uvwa ne mukenji uvwaye ne cya kutuma, mukenji wa lukasalukasa, anu bwa mwena lukuna. Nenku ke yêyè—yêyè kwambila kalumyana aku kavwa kiimane mwaba awu, yêyè ne: “Wê, angata mukenji ewu, angata mukenji ewu! Nda lubilu ku mwaba *kampanda*—mwaba *kansanga*, utume dîyi bwa kwenzabo *cikampanda*.” Ke yêyè ne: “Angata dikombo dyanyi dya bukalenge edi mu cyanza. Ke diikalà mwa kukushindika, bwa ne mêmè ngudi. . .udi mutumiibwe kûndi mêmè.”

²⁰⁵ Ke yêyè kudipayika mwinshi mwa cinkoozi cyende, ke yêyè uyaaya wawa. Balami baa ku biibi myaba yônsò benza kumwimanyika, ne bakwabo bônsò. Uvwa wela lubila ne: “Shiyaayi mwaba! Ndi ne mukenji wa kudi mfumu.” Amen. “Ndi musanjeela wa mfumu,” dîyi dishindika.

²⁰⁶ Mêmè kudyambidila ne: “Sataana, umuka mu njila wanyi! Ndi ne Mukenji wa kudi Mfumu. Ndi ne cya kuya.”

²⁰⁷ Musangu kampanda paakashipabo Mfumu wa Ditalala, ne kuMwelabo mu lukita, ne kukangabo ku majambu aku, ne lufu kuMulama munda mwa matuku asatu a muunya ne a bufuku. Kadi dinda dya Paasaka Yêyè uvwa ne dikombo dya bukalenge mu cyanza Cyende, wakeela lubila ne: “Shiya mwaba, wêwè lufu! Shiya mwaba, wêwè lukita! Unzuluka! Mêmè ndi Mukenji wa kudi Mfumu. Ndi ne cya kupatuka bwa kufila cijaadiki cya dibiika dya ku lufu edi. Mêmè ke dibiika dya ku lufu ne Mwoyi.” Aleluuyah! Kadi ngâdyûmvù bilenga bya dikema mpindyewu.

M’Mukenji wa kudi Mfumu. TùWùjingùlùlaayi, balunda baanyi, bwalu tudi babiikidiibwe bwa kudisangisha bwa mwadi wa Mpungi. “Bwalu Mpungi wa Mukalenge neadile, pa dîbà adi cikondo kacyakwikalaku kabidi to.”

²⁰⁸ Wasangishi Izaleela. Matuku asatu awu, mu dituku diisâtù ke mudiYe mwambe ne Neénzè bwalu abu. Bidimu binunu bibidi ne nkama mwandamutekete bikaadi bipite. Mu dituku diisâtù amu mmudiYe mwambe ne Neabasangishe, ne Yêyè wâcyênji. Wakamba ne Neamanyishe njila wa Mwoyi. Bwalu mbwabu’s, bindile mpindyewu anu bwa Mukaji Musela uumuke mu njila bwa bôbò bamone mwa kulwa, baprofeta babidi abu, baprofeta baa beena Ebelu, biikala mwa kujingulula.

²⁰⁹ Nudi bavuluke pâmvwà mwimane mu Caire mwamwa, bwa kuya kuntwaku, paakamba Lewi Pethrus ne: “Mwaneetu Branham, bôbò badidinge anu bamone aci. . .Bôbò batu biitabuuja baprofeta baabo bôbò.”

²¹⁰ Mêmè ne: “Ncintu cîmpè bwanyi mêmè.” Nudi numona mushindu udi muntu anyi? Kadi nudi numona ngâsà wa Nzambi anyi? Mêmè ne: “Nêmbalè Dipungila Dipyadiya edi.” Bakaavwa baDibale. Lewi uvwa mubatumine, mikanda mipite pa mùliyô mujima, kwine kwaka, Mwaneetu Lewi Pethrus wa ku Suède.

Bawwa mwa kuDibala, babanda bapweka, biine beena Yuda abu; kabiyi bu musumba wa beena Yuda baa cyena leelu aba to, kadi mu buloba bwabo. Ke kupweka kulwaye, yêyè ne: “Nî m’Maasiya, tudi baswe kumumona wenza cimanyinu cya muprofeta, netwitabuuje.”

211 Lewi Pethrus ne: “Mwaneetu Branham, mpunga’s ke yêyè awu. Mpunga’s ke yêyè awu.” Muntu mukwabo mmungambile ne—ne neciikale mpunga. Mêmè ndi mukuye, mupweke too ne kwôkò aku.

Muntu mukwabo kulwaye e kusòmbayè mwaba awu, Mwaneetu Arganbright, yêyè ne: “Mwaneetu Branham, aci’s ncifwanyine kupapula Izaleela! Ubapatule kumpala kwa Cyôci aci, kadi ubaleeje cimanyinu cya muprofeta. Nebâcitabùùjè.”

212 Mêmè ne: “Mukalenge, s’ke mêmè ewu, mudilongolole.” Kutupika kubwela mu ndeke; kwangata mfranga e kuya kasumba ticket; kwimana mu Caire. Mêmè ne: “Eyo, ndi mudilongolole.”

213 Nyuma Mwîmpè kwamba ne: “Ewu mwaba kî ngwebe to. Edi kî ndîbà dyebe wêwê to.” Nwamonu’s, udidyanjidila’s. Mêmè kudyambidila ne: “Kaa, ekelekele! Mumane kufika too ne apa; ndi anu nya.”

214 Cintu kampana kwambaci ne: “Imanyina anu mwaba ewu! Kuyi njila awu to. Kudimuka ubwele mu Inde. Kuyi aku to. Nda ku Inde, kadi kuyi eku to.”

215 Mundamunda ne: “Bwa cinyi’s?” Pâmvwà ngenda mpatukila lwa paanyima paa citanda, mêmè ne: “Mukalenge Yesu, eci mbwena kwamba cinyi?”

Ke Yêyè kumanyisha. “Kî mmuntu wa baa Bisamba bya bende to. Baprofeta aba ke badi bakengela.” Bikengela ciikale cikumbanangane ne Mufundu’s. “Bikengela Môsà ne Eliya balwe.” Nenku, pa kuumusha aci to, Mukaji Musela kî mmwanji kuumushiibwa mu njila to. “Nenku baprofeta abu nebaalukile ne bôbò ke benza cimanyinu cya muprofeta.” Ke Mufundu ngwawu. Ke cyôci aci cyûle cyônsò mwaba awu, patapata, Izaleela bu ditunga nealediibwe mu dituku dimwe. Amen! Makênkè a diloolo akaadi munkaci mwa kuteema!

Nekwikale Bukênkè lwa pa dîbà dya diloolo,
Kajila kaa ku Butumbi nenukapete bushuwa;
Mu njila wa mâyi, mmudi Bukênkè leelu ewu,
Bajibikila mu Dîna dya mushinga dya Yesu.
Batekete ne bakole, nyingalalaayi ku
mpekaatu wenu,
Nyuma Mwîmpè neabwele bushuwa;
Makênkè a diloolo afiki,
Ncijaadiki cya ne Nzambi ne Kilisto badi
Umwe.

216 Tudi ku cikondo cya kunshiikidilu, mulunda wanyi. Nenku pashiishe patudi tuvuluka musambu ewu wa mufundi musonsola ewu, padiye mwambe ne:

Matunga adi apanduluka, (eci kukaadi bidimu dikumi ne bitaanu), Izaleela nyewu utabuluka,
Bimanyinu byakadyanjila baprofeta kwamba;
Matuku a baa Bisamba bya bende mmabala,
(tangilaayi bukooya bwende mpindyewu)
mûle ne bintu bidi byenza bwôwà.
Alukilaayi, Eyi nwênù badi batangalajiibwe,
kudi beenu.

Dituku dya bupikudi didi pabwîpì,
Myoyi ya bantu ke kufwayi ne bwôwà eku;
Ujiiibwâyi ne Nyuma wa Nzambi, ikalaayi ne
myëndù yenu milongolola ne misukula,
Bandulukaayi, bupikudi bwenu bukaadi
pabwîpì. (Aci ncyà bushuwa.)

Baprofeta baa mashimi badi badinga, badi
babenga kwitaba Bulelela bwa Nzambi, (aci
kî mbulelela anyi!)
Bwa ne Yesu Kilisto udi Nzambi wetu.

Bôbò kabeena biitabuuja Aci to. Badi ne tusumbu ne bintu bikwabo bya mishindu yônsò! . . . ? . . . bilelela to. Kadi muprofeta wakamba . . . Anyi, mufundi musonsola wakamba ne:

Netwendele myaba yakadyata bapostolo.

217 Nudi bavuluke mu cikeena-kumona cyanyi anyi? Mwya mwambe ne: “Piikala bàà Pôlò mwa kubwela, baanyi paanyi nebabwele, bwalu ndi mwenze menemene anu mwakenzaye yêyè.” Ndi nshala anu ne Cyôci aci.

Milyô ya bantu ayi kungelabo maboko, bamba ne: “Pa cyôci aci mpatudi biikishile!”

Cinyi? Kujungulula dituku ditudi ne mwoyi, cikondo citudi ne mwoyi, cimanyinu cya cikondo citudi ne mwoyi. Dîbà didi mwa kwikala dimane kuya kupita mutudi twêtù twela meejî amu. Abidi adi panshi aa, ewu udi pambelu atungunuke anu ne kushaadila pambelu pende apu. Ewu udi munda udi ne cya kutungunuka anu ne kwikala munda amu kashidi. Ciibi necikangiibwe.

218 Piikalaku bakwabo mwaba ewu mu dinda emu badi kacya kabayi banji kubwela to, kaa, mu Dînà dya Yesu, bakwetu bananga . . .

Kanwikadi nutangila musadidi mupangi udi mwimane mwab'ewu ewu to, mbûlù wa banana, udi kamanyi mukanda, kayi mulonge; kanutangidi aci to. Kadi tangilaayi Diyî didi munkaci mwa kujaadikiibwa edi. Tangilaayi Nyuma Mwîmpe

wa butumbi Udi ushindika Cyôcì aci ne m'Bulelela. Tudi pa dîbà dya diloolo. Dîbà ndimane kuya kupita munudi nwela meeji amu. Kanwikadi . . .

²¹⁹ Nwênù bakaji, lekelaayi nsuki yenu ikole. Wêwè mwaneetu wa bakaji, bu wêwè mwa kuswa umusha bilâmbà byebe bya manyaanu abi. Imanshaayi mici ya mfwanka ayi. Bwalu dîbà nedilwe, dya ne: “Ewu udi mukooyike, atungunuke anu ne kwikala mukooyike; ne ewu udi mwakane, atungunuke anu ne kwikala mwakane. Ewu udi munda udi munda; ewu udi pambelevu udi pambelu.” Kaaba kakese kakushiila, kanciin kadi ne: “Piikala muntu mwakane usungidiibwa ne lutatu, ngenzâmpèkââtù ne mubi,” ewu utu ubenga kwitaba Bulelela awu, nudi bamanye, “nebashaadile penyi?”

Twinyikaayi mitu yetu.

²²⁰ Mpindyewu, mu Bukênkè bwa dîbà ditudi ne mwoyi mpindyewu edi emu, Bukênkè bwa dituku ditudi ne mwoyi mpindyewu edi emu; nwênù bananga baanyi baa mushinga mukole, nwênù badi bafumina ku matunga mashiileshiilangane nuumuka eku ne eku kwa ditunga edi, mpindyewu twênzâayi nunku, ne mêmè ne nwênù cyapamwe, ku cyoshelu eku, tubalululaayi maalu etu. Nyuma wa Nzambi udi bishi mu myoyi yetu leelu ewu? Nwavulukaayi ne, n’Nyuma awu, kayi dipiila, kayi mutapile twîshî; dilongesha dya ekeleeziya yônsò naka, ne bikwabo, byamanyi kuya byônsò nkòong.

²²¹ Kudidingi kudidingi kuteeta kusakidila ku Cyôcì aci anyi kuKuumushila. Bwalu, wêwè anu mudidinge muteete kwelaMu dyebe dyumwija, dya mu wêwè, cyebe citupa bãcyûmûshî ku Mukanda wa Mwoyi. Udi uteeta kwamba cintu cidî Nyuma kayi mwambe anyi? Udi uteeta kwenza ne Cyôcì aci cyumwike ku maci bu ne nCyambe cintu kampanda anyi? Anyi, udi uCyangata anu menemene mudiCi cyambe amu, ne uCilekela mushindu awu? Udi ulamakaja tutupa twa mikaba, ukosa, utentula mikaba ya mêyi, wenza bintu bîdi kabiyi bîmpè anyi? Udi mubyênzè anyi?

²²² Udi wamba ne: “Ee, ncyêna anu ndyumvwa bu ne ndi ne cya kwenza *cikampanda* to. Anyi, pâmwâpa, ndi—ndi—ndi mumanye ne ekeleeziya wanyi kêna uCiitabuuja to. ‘Aci cidî anu dîyi dya muntu umwepele pa bîdi bitangila Cyôcì aci.’”

Muntu mwine umwepele awu’s n’Nzambi. Bible mwaba ewu ngudi wamba ne kwêna ne cya kukosa nsuki yebe to. Aba . . . Bible ngudi mwambe nanku. “Nebyenzeke ne bakaji nebavwale bilâmbà bifwanangane ne bya balume, ne mwikalabo cinyangu kumpala kwa Nzambi.” Mushindu wakaakwila Nyuma Mwîmpè mukana mwa lupanza elu, lwa bupwekele, kaluyi lukumbanyine kadi byenzeke paabi ne uvwa anu mwimane mwaba awu mu cikondo civwa Mfumumunene mwambe ne: “Lukita Lwanyî ndwôlò elu, Dîyi Dyanyi.” (“Dikombo Dyanyi dya bukalenge

ndyôdi edi,” aci nanku’s we.) “Angata Dikombo Dyanyi dya bukalenge, ne ndaaku, ne ndaaku ne Mukenji.”

223 Ndi mumanye ne mangumba mmateete kuWimanyika, ne kuWela pambelu, kuWusakila pambelu, kuWutwa miseba too ne pambelu, ne bikwabo byônsò. Kadi, ku ngàsà wa Nzambi, ndi mu njila ngenda nya, ngela mbila ku ditunga ne ku ditunga, ku mwaba ne ku mwaba, ku ekeleeziya ne ku ekeleeziya ne: “Patukaayi mu cintu aci!” Kî ncitambe kumanyika to, kadi Cidi Bulelela.

224 Udi muswe kuWupeta mu—Nyuma mudibo baWufunde anyi? Udiku muswe kuWupeta mu Nyuma mudibo baWufile anyi? Pawikala kuyi mwanji. . . Katwena ne kaaba bwa cyoshelu to; mwoyi webe awu ke cyoshelu ciine. Udiku mufwanyine kwela cyanza muulu, kwamba ne: “Nzambi, ikalaku naanyi luse. Lekelaku bwa Nyuma wa Nzambi abwele munda mwanyi, mwikale umpiisha mpindyewu ku mpekaatu yaanyi yônsò, ne ditekeshiibwa dya mu maboko, biibidilu byanyi bibi byônsò, ne bilunji bya ciiji, ne dikokangana, ne dilwangana dya mvita, ne dibinduluka, ne byônsò bînkaadi mwenze abi. Kabidi ndi mumanye cintu kampanda, ncyà ne nyuma wanyi kî mmupole bwa kuya mu Dyulu to. Mvwijeku mupole, Mukalenge, mu dîbà edi dya ndekeelu. Edi diyiiisha didi mwa kwikala dya ndekeelu dîndiku mwa kuumvwa. Ewu musangu udi mwa kwikala wanyi wa ndekeelu wa kuumvwaku kabidi Mukenji. Nyewu ngela cyanza muulu. Nzambi, ikalaku naanyi luse.”

225 Nzambi anubeneshe. Byanza dikumi ne bibidi misangu nî nyinga. Mpindyewu, anu bwa katanci cyanaana bwa disambila dya cimùmà bwenu nwênù. Wêwè udi wela cyanza muulu awu, bidi bileeja ne bwalu buciidi bukusankishe. Kûndi mbimweneke anu bu ne Nyuma uciidi anu ubiikila muntu kampanda.

226 Nzambi munanga, Wêwè Udi mumanyi wa maalu ônsò. Ne Wêwè ngwâkenza bintu byônsò mu kiipacila kaa maalu ônsò, bwalu, bivwa bikengela bwa bakwabo bapiishiibwe, bakwabo bafofomijiibwe; bakwabo, “bu mudi mufumbi wâkenza dibungu,” bu mwakamba Pôlò, “dimwe bwa luumu ne dikwabo bwa bundu.” Dyâkenjiibwâ bwa bundu adi, divwa anu bwa kuleeja patooke edi divwa dikengela kupa luumu. Kadi aci kaciyena mu cyanza cya Mufumbi bwa kwenza cidiYe muswe anyi? Kaciyena mu ndongamu mudyanjila kulongolola wa Nzambi, bwa kubiikila anyi? “BaakadyanjilaYe kumanya, Wakababiikila. BaakabiikilaYe, Wakababingisha. Ne aba baakabingishaYe, Wakabatumbisha.”

227 Pâmwâpa bamwe baa kudibo mwab’ewu leelu ewu mbenze bu kakaji kaa ku ciinà cya mâyi aku, baye kule mu bukooya, baye kule mu bupidya, baye kule mu bilele bya bantu, malongesha makwatakaja kudi bantu. Pâmwâpa ewu ke wabo paabo musangu wa kumpala wa kuumvwabo maalu aa, kadi cintu

kampanda ncidimwije myoyi yabo mu mushindu wa pabwawu. Kudi byanza byàbûngì, byàbûngì bidi byela muulu, Mukalenge. Mufumbi munene angate dibungu adi mpindyewu bwa adifumbe dishaale dibungu dya luumu. Ndi ngitabuuja ne kudi kiipacila kampanda, Mukalenge, cyanaana kabavwa mwa kucyenza to, kabavwa mwa kwamba nanku to. Mêmè nciidi anu ngitabuuja, nciidi anu mukwate bwabo bôbò.

²²⁸ Lekelaku bwa musadidi webe wa bupwekele ewu akwilangane, Mukalenge. Utulekele tûbâkwile, bu mudi muntu udi mwimane pankaci paa baa mwoyi ne bafwe; byenze bu ewu uvwa mu Sodoma mwikale wakwila beena Sodoma ne: “Patukaayi muntwamu! Patukaayi muntwamu, lukasa!”

²²⁹ Enzaku bwa balwe, Mukalenge, ne didipwekesha dyônsò ne bupole bwônsò mpindyewu ku nkwaswa wa butumbi wa Nzambi, mu myoyi yabo, biikale bamba ne: “Yesu, kubangila ku lelu ewu, kubangila ku mpindyewu, Wêwè newikale wanyi mêmè. Ndi ngenza mucipu ewu Kûdi mpindyewu mwab’ewu, pândi musômbe mwab’ewu mu nkwaswa ewu mudi Nyuma Webe mundenge emu. PiikalaYe ne m’Mundenge mwab’ewu, kabyena bikengela nye kule mpite apa to. Anu mwab’ewu ke ûdi Wêwè mutuutakeene naanyi; anu mwab’ewu ke utwikala mwa kulongolola bwalu abu; anu apa mu nkwaswa mwibîdì ewu, nkwaswa mwisâtù, nkwaswa mwitânù, yônsò udiku awu. Anu apa mpiikala bwalu ne cya kulongolodiibwa, bwalu pôpò apa ke paudi Wêwè mumpiishile, pôpò apa ke paudi Wêwè mulaye bwa bwôbò kulongolodiibwa. Bwalu nansha mêmè mufwanyine kwikala ne bukooya ne manyaanu, nêmvwijiiibwè mutooke bu nêjè. Nêngitabuuje Diyî Dyebe dyônsò. Ndi mudilongolole bwa kwendelaMu, kuDiiatabuuja, kuDiiataba.

“Ne ndi ngenza mpindyewu cyôcì eci bwa butumbi bwa Nzambi, mumanye ne nsômbelu wanyi kêna mwîmpè kûndi to, kêna mwîmpè kudi Nzambi to, kêna mwîmpè kudi beena mutumba naanyi to, kêna mwîmpè nî nku cinyi cikwabo cyônsò to; mmwîmpè pende anu bwa dyabulu, bwa kumvwijaye mêmè muntu wende wa ditumakaja, bwa kwikala wankupa eku wankupa eku, pâmwâpa bwa mêmè kushaala mwânà wa biteetela wa muntu kampanda kwikalaye kubandila, pâmwâpa lupingu lwa mukaji kampanda. Nzambi, ngenza musadidi Wêbe.” Enzaku nanku’s, Mukalenge. Nyewu mbalambula Kûdi mpindyewu, mu Dînà dya Yesu Kilisto, Mwânà Webe.

Ne mitu yetu miinyika, ne myoyi yetu.

Ndi mwa kuumvwa Musungidi wanyi. . .

Ne meeji matooke ônsò, mulunda wanyi. Cidi mwa kwikala webe peebe musangu wa ndekeelu. Udiku mwa kuumvwa kaadiyi kakese aku anyi?

. . . ubiikila,

Ndi mwa. . .

Ncinyi cidiYe ubiikidil- . . . Ncinyi cidi cikubiikila, piikalabi ne Musungidi webe ngudi ukubiikila? Dìyì.

. . . Musungidi ubiikila,

Cyûdi ne cya kwenza ncinyi? Kubenga kwitaba maalu a pa buloba.

Nêngàngatè nkuruse wanyi ndonde,
ndonde. . .

“Ndi mulengulule dibatiiza mu Dîna dya Yesu, Mukalenge.”

Nênye Nende tuplicila mu budimi,
Nênye. . .

Nende Yêyè, penyi? Nupicila mu mâyì, nupicila mu budimi, nupicila mu myaba yônsò; nzubu wa disambila, mu ciinà cya mâyì, nansha penyi. Pangadika bwalu abu!

. . . nye Nende tuplicila mu budimi,
Nênye Nende, Nende ne kundekeelu kwa njila.
Nênye Nende tuplicila ku cilumbulwidi (Dìyì
ndidi dya bushuwa anyi ekeleeziya ngudi wa
bushuwa),
Nê- . . .

“Mêmè nî ngudi mubinge, anyi Yêyè nî ngudi mubinge. Kondo kaanyi kaa mmwoyi nkadi kabinge, anyi Dìyì Dyende ndidi dibinge?” Udi mwaba wa cilumbulwidi mpindyewu. “Cîndi mêmè mwitabuuje, ncidi cya bushuwa anyi, anyi Dìyì Dyende ke dya bushuwa? Ntu ndyambidila ne mbikumbane kwikala ne nsuki mîpi, kuvwala tuputulu anyi? Ntu ndyambidila ne mbikumbane kwikala mwena dingumba anyi?” CituYe mwambe ncinyi?

Nênye Nende, Nende ne kundekeelu kwa njila.
Mpindyewu kwandombolaYe ke kûngààlondà,

Nyewu ndi mwele byanza byanyi muulu, mêmè paanyi, Mukalenge. Mukalenge, nansha kwôkò penyi, mpenyi paayiishiibwa Mukenji udi ulonda? Mmwab’ewu, diloolo edi, mmu Afrike, mmu Allemagne, mmu Suisse anyi? Mpenyi, Mukalenge?

KudiYe. . . (kwônsò kuWandombola aku,
Mukalenge) . . . ke kûngààlondà,
Nênye Nende, Nende ne kundekeelu kwa njila.

Mpindyewu ne mitu yenu miinyika.

²³⁰ Udi muswe kuya Nende kwônsò kwakulombolaYe aku anyi? Udi muswe kuya Nende piikala bikondo bikaadi bishaale bya butekete, piikala bantu bakengeshangana, basekangana, beelulwilangana anyi? “Mêmè nêntungunukè anu ne kwikala Nende. Nêntungunukè anu ne kuya. Nêntungunukè anu ne kuya Neebe, Mukalenge, kwônsò kuWikala aku. Nêntungunukè anu ne kwimana mwikale nneemeka bîndi ngamba ne wa lulamatu.

Mu luuya lwa mvita, nêntungunukè anu ne kwimana mwikale nneemeka bìndì ngamba ne wa lulamatu. Mêmè mudishinde, Wêwè neunjuululule, Mukalenge. ‘Ewu udi ujimija mwoyi wende bwa bwalu Bwanyi neawupete.’”

Nanku nênye Nende, Nende ne kundekeelu
kwa . . .

²³¹ Mpindyewu bônso badi bamba bambilamu, mu myoyi yenu, twêlààyi byanza byetu muulu mpindyewu, ne myoyi yetu, tubibandisha kudiYe.

Mêmè . . . KwandombolaYe ke kûngààlondà,
KwandombolaYe aku ke kûngààlondà,
KwandombolaYe aku ke kûngààlondà,
Nênye Nende, Nende ne kundekeelu kwa njila.

Yêyè neâmpè ngàsà ne butumbi,
Yêyè neâmpè . . .

Mukalenge Yesu, ela mpindyewu mupuuya pa mishwala eyi. Ondopa babeedi ne beena ntatu aba, Mukalenge. Enzaku nanku, Mukalenge. Ubape dyondopa, Mukalenge, mu Dînà dya Yesu.

Ne neaye naanyi, naanyi ne kundekeelu kwa
njila.

²³² Nudi nudyumvwa bîmpè mpindyewu anyi? [Disangisha didi dyamba ne: “Amen.”—Muf.] Nudi nudyumvwa ne byônso bikaadi bilongolola mpindyewu anyi? [“Amen.”] PiikalaYe . . .

Paadila Mpungi wa Mukalenge, ne cikondo
kaciciyiku kabidi to, (awu ke Mpungi wa
ndekeelu, mpindyewu)
Ne paabanga dinda dya Cyendelelee,
dibalakana ne dîmpè.

Twîmbààyi musambu awu, twêtù bônso. “Paadila Mpungi wa Mukalenge.” Tupeeshaaku cyona tûng.

Paadila Mpungi wa Mukalenge, ne cikondo
kaciciyiku kabidi to,
Ne paabanga dinda dya Cyendelelee,
dibalakana ne dîmpè.
Paadisanga basungidiibwe baa pa buloba ku
mwelelu wa mâyi wa dyamwamwa,
Paabiikilabo mênà pa dibeji mwamwa muulu,
nêngikalèku.

Paabiikilabo mênà pa dibeji mwamwa muulu,
Paabiikilabo mênà pa dibeji mwamwa muulu,
Paabiikilabo mênà pa dibeji mwamwa muulu,
Paabiikilabo mênà pa dibeji mwamwa muulu,
nêngikalèku.

Mu dinda adi didi dibalakana ne kadiyi
 mavuba dyabiika bafwe mu Kilisto,
 Biikale baabanyangana butumbi bwa dibiika
 Dyende dya ku lufu;
 Pa dîbà adi piikala mwoyi wònsò mujike, ne
 mudimu wetu wònsò pa buloba mwenjiibwe,
 Ne paabiikilabo mênà pa dibeji mwamwa
 muulu, nêngikalèku.

Paabiikilabo mênà pa dibeji mwamwa muulu,
 Paabiikilabo mênà pa dibeji mwamwa muulu,
 Paabiikilabo mênà pa dibeji mwamwa muulu,
 Paabiikilabo mênà pa dibeji mwamwa muulu,
 nêngikalèku.

²³³ Twèlààyi byanza muulu, twamba ne: “Ku ngàsà Webe, Mukalenge.” Ku ngàsà Webe, Mukalenge! [Disangisha didi dyamba ne: “Ku ngàsà Webe, Mukalenge.”—Muf.]

Mpindyewu, tudi bânà beetu baa balume ne baa bakaji mu Kilisto. Tukudimukaaayi anu cyanaana tulabulangane ku cyanza ne muntu udi ku luseke lwebe awu, twamba ne: “Ku dikwacisha dya Nzambi, paabiikilabo mênà pa dibeji mwamwa muulu!”

Paabiikilabo mênà pa dibeji mwamwa muulu,
 Paabiikilabo mênà pa dibeji mwamwa muulu,
 Paabiikilabo mênà pa dibeji mwamwa muulu,
 Paabiikilabo mênà pa dibeji mwamwa muulu,
 nêngikalèku.

Citudi bindile ncinyi?

Paadila Mpungi awu (wa ndekeelu awu) . . . wa Mukalenge, ne cikondo kaciciyiku . . . (Bamane kuditwa mu Cyendelele: “Mu katanci, mu mupodi wa dîsù.”) . . . ne dîmpè; Ne pashiishe paadisanga basungidiibwe baa pa buloba ku mwelelu wa mâyi wa dyamwamwa,
 Paabiikilabo mênà pa dibeji mwamwa muulu,
 nêngikalèku.

Tùwîmbààyi ne dîyi dikole!

Paabiikilabo mênà pa dibeji mwamwa muulu,
 Paabiikilabo mênà pa dibeji mwamwa muulu,
 Paabiikilabo mênà pa dibeji mwamwa muulu,
 Paabiikilabo mênà pa dibeji mwamwa muulu,
 nêngikalèku.

²³⁴ Kaa, aci’s neciikale cikondo eyo! Wenda wendakana anu cyanaana, dîngà dituku, ke muntu kampanda ewu umweneka pwàà. “Nganyi mwine awu? Maamu!” Amen! “Kakwakunenga kabidi to bwa mpindyewu.” Anu mu tusunsa kukesee naka anyi, wèwè mushintuluke. Nenku netwikale . . . netusangile

naabo, pashiishe twambwibwa naabo cyapamwe, bwa kuya kasambakeena ne Mukalenge mu mpepele. Kaa, mu katanci, mu mupodi wa dîsù. Twamba ne: “Mona Mwaneetu Seward, mwaneetu wa mukulakaji uvwa ne ciibidilu cya kwikala mu ekeleeziya emu awu! Aka, mona Mwaneetu DeArk. Mona Mwaneetu *Kampanda*. . . Aka, tangila eku, bakaadi bônso bannyungulukile! Mbwalu kaayi ebu? Mwab’ewu anu mu tusuna tukese cyanaana. . . Ndi mumanye ne bôbò baamanyi kummwenekela. Kakwakwenza mutanci mule mpindyewu to. Mêmè nêshintulukè mpindyewu, anu mu katanci aka, anu mu katanci aka.” Kaa, eyowa’s we! Nenku dinda dya Cyendelelele dibanga, dibalakana diikale dîmpè. Mavuba ônsò atu masokome awu. . .

²³⁵ Anu bu mwakambaYe ne: “Izaleela, wêwè ukaadi bu ditutu dya mu dinda, dibungi, ne bwakane bwebe budi bujimina.” Ne paaJimina byônsò abi byenguluka mu Bukênkè bwa Mwânà Udi mubikwate byônsò abi awu, amen, pa dîbà adi: “Paabiikilabo mênà pa dibeji mwamwa muulu, nêngikalèku.” Bîmpè be.

Too ne diloolo edi:

Too ne patwasangila! Too ne patwasangila!

Katwema bamanye ne ndîbà kaayi diikala bwalu ebu mwa kwenzeka, balunda baanyi. Cikaadi bwalu bulonda, kukaadi ntanta mule, kadi m’Bulelela, kadi nebwenzeke. Tukaadi pa dîbà adi mpindyewu.

Too ne—too ne patwasangila, too ne patwa-. . .

Ku ngàsà wa Nzambi, tudi tutekemena, pa dîbà mwandamutekete ne tusuna makumi asatu diloolo edi.

Nzambi ikale neenu too ne patwasangila kabidi.

Tujuukilaayi kuulu mpindyewu.

²³⁶ Kaa, kî mbyenze ne mulowu anyi? “Eci mmyaba ya mu Dyulu mu Kilisto Yesu.” Ncyênàku mufwanyine kushintakaja eci ne cîngà cintu to. Nudi bamanye mûntù munange kuloba mishipa ne mûntù munange kutwa buluwà, bwalu ntu mmona Nzambi pambelu paapa mu myaba ya bipeela. Ntu munange cyôci aci. Kadi, kaa, ncyênàku mufwanyine kushintakaja kasunsa nansha kamwe ne cyôci eci to, ne malabula ônsò a nkama ya bidimu. Kasunsa kamwe kaa cyôci eci, disankishiibwa adi!

²³⁷ Nzambi, fuka ditabuluja munda mwanyî. Enzaku bwa ngikale ditabuluja diine. Enza bwa muntu ne muntu wa kutudi ikale ditabuluja diine, ditabuluja munda mwanyî. Enzaku, Mukalenge, ngikale ne nzala, enzaku ngikale ne nyoota. Fuka munda mwanyî, Mukalenge, cidî cikengela kwikala munda mwanyî. Enzaku ne, kubangila pa dîbà edi, ngikale Webe; musadidi mutambe kudilambula, mutambe kubeneshiibwa Kûdi; mwikale ne bukole bupite, ne kudipwekesha kupite, ne

musangeelu mupite, ne mutambe kuswa bwa kwenza mudimu; mutambe kwikala ntangila ku bintu bidi bya bushuwa, ne mwikale mpwa mwoyi bintu bikaadi bishaale paanyima, ne bidi bibi. Enza bwa nye mulwijakaje ku dibiikila ditumbuke dya Kilisto. Amen.

Ke dijinga ditudi naadi, kî mmwômò anyi? [Disangisha didi dyamba ne: "Amen."—Muf.]

Mbîmpè, twangataayi, too ne patwasangila diloolo edi, twangataayi Dîna dya Yesu twikale naadi mpindyewu, muntu ne muntu wa kunudi mpindyewu.

Angata—angata Dîna dya Yesu wëndè naadi,
Wèwè mwânà wa kanyinganyinga ne dikenga;
Nedikupe disanka ne busambi,
Nda naadi kwônsò kûyaayà.

Dîna dya mushinga, Eyi dya bupole be!
Ditekemena dya buloba ne disanka dya Dyulu;
Dîna dya mushinga, Eyi dya bupole be!
Ditekemena dya buloba ne disanka dya Dyulu.

Mpindyewu twinyikaayi mitu yetu.

Angata Dîna dya Yesu wëndè naadi,
Bu ngabu ku buteyi bwônsò;
Paakujinga mateeta ku nseke ne ku . . .



JINGÜLÜLÀ DITÜKÜ DYÈBÈ NÈ MUKENJI WÀDÌ LUA64-0726M

(Recognizing Your Day And Its Message)

Diyiisha edi dya Mwaneetu William Marrion Branham, dyakayiishiibwa musangu wa kumpala mu Anglais mu dyalumingu mu dinda, dya 26 ngondo wa mwandamutekete, 1964, mu Branham Tabernacle mu Jeffersonville, Indiana, U.S.A., ndyumusha pa mukaba wa méyì ne dittuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2017 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org